



明分省人物考 百三之四

|      |     |    |    |    |
|------|-----|----|----|----|
| 漢書門類 | 一五七 | 八九 | 函架 | 冊架 |
| 類    | 五   | 八  | 九  | 四  |

|      |     |    |    |    |
|------|-----|----|----|----|
| 內閣文庫 | 漢書類 | 八九 | 函架 | 冊架 |
| 漢書類  | 八   | 九  | 六  | 二  |
| 類    | 五   | 八  | 四  | 七  |


|      |           |
|------|-----------|
| 內閣文庫 |           |
| 番號   | 漢 8985    |
| 冊數   | 64 ( 57 ) |
| 函號   | 287 161   |





人物考卷之一百三目錄

陝西西安府



丘玄清

康汝楫

張統

李昶

程濟

韓永

李翔

高士文

李暹

張賢

周彧

林嵩

李錫

段信

楊鼎

王恕



本朝分省人物考卷一百三目錄

邢簡

姚顯

宋欽

趙謚

李錦

東思忠

張鼎

韓紹宗

雍泰

張曉

李崙

楊時暢

張鸞

劉璣

屈直

康海

馬應祥

薛敬之

張潛

尚衡

郭桂

王納誨

張璉

王承裕

徐璉

李紀

東郊

郭田

朱騁

本朝京省人物考卷之一百三

南直督學御史西浙過庭訓纂集

門人蘇松備兵副使南郡熊 膏叅閱

男 過銘盤

過銘孟

過銘籃

寧國府學生員嚴弘志全訂正

陝西西安府

丘玄清

丘玄清西安富平人洪武初遊武當常見張三丰授

以飛舉之術有司以賢才薦於朝授監察御史賜之  
室力辭弗受轉太常卿每遇大祀天地時 上宿齋  
宮諮以雨暘之事玄清奏對歷歷有驗 上深敬焉  
公餘黃庭道德不輟於口閑則凝神坐忘一夕謂其  
徒曰明日乃吾全歸之辰至期端坐而逝壽六十七  
朝廷遣禮部侍郎張智諭祭還葬五龍宮黑虎澗之  
上

康汝楫

康汝楫字濟川武功人洪武初以明經任縣學訓導  
辟爲 燕王府長史出知安岳縣靖難後拜左侍郎

輔 皇太子克盡其職卒洪熙初贈工部尚書

張 統

張統字昭季富平人自少勤學勵行初以明經舉爲  
東宮侍書才敏識博 懿文太子甚器重之洪武十  
二年陞通政司左叅議尋爲雲南右叅政進左布政  
使統在雲南最久夷民心孚遠近安之凡土地貢賦  
法令條格祀神壇祠公署解宇與夫上下典儀公用  
程度皆出統裁定是時雲南多中國衣冠流徙統與  
諸名士王景董倫輩定交而厚卹之其他在管内者  
不問識與不識皆若親舊以故遷謫至者如歸二十

三年入覲 上嘉其能賜以 璽書且勞之曰張統  
來朝不待考而朕知其功出天下十二牧之首復賜  
宴及道里費令還治旋拜吏部尚書去官之日滇人  
思慕如失父母建文初年旁求四方隱逸鱗集闕下  
悉委統臨試之統識鑒精朗振抑淹量才授任各  
適其宜大著時譽會修 太祖實錄被旨試翰林之  
與編纂者考第高下時楊士奇以教官徵入統讀其  
試策獨喜曰明達時務材堪大任不但文詞之工也  
以爲第一奏授王府審理士奇由是著名壬午六月  
靖難兵至京討奸黨統與焉 太宗以統久事 皇

考習知典故釋不問統自經于部院之後堂所著有  
鷄庵集

李 昶

李昶字文燁涇陽人自少敦厚穎敏刻志問學洪武  
丙子由鄉薦入太學擢左軍都事有能聲尋陞戶部  
郎中績用茂著永樂初肇建北京以薦特陞行部右  
侍郎昶協心經畫事無廢弛壬寅轉戶部侍郎凡國  
之儲蓄民之貢輸以至賦稅損增金帛出納皆調度  
有方規畫有法及扈從北征董運糧餉士馬足用而  
無匱乏之虞宣德五年陞戶部尚書賜以寶帶且命



專督收支方有條緒而大命及之訃聞賜祭葬如例

程濟

程濟朝邑人有法術洪武末以明經為四川岳池縣教諭岳池去朝邑數千里濟寢食俱在朝邑而日治岳池學事不廢革除間上書言某月某日西北方兵起朝廷以為非所宜言繫至京召入將殺之叩頭曰陛下幸納臣至期而無兵臣死未晚也遂詔繫獄已而兵果起乃赦出尋以為軍師護諸將北行戰於徐州大捷會曹國公師退 文皇帝至江上濟逃去不知所終始徐州捷時諸將樹碑載戰伐次第及統軍

者姓名濟一夜往祭其碑人莫測其故後 文皇帝過徐州望見碑顧左右曰碑者何也或以狀對 上大怒趣左右毀碑一再擊遽曰止為我錄碑文來乃按碑族誅諸無得脫者濟姓名正在擊處得免向者之祭蓋禳之也

韓永

韓永西安人建文間為兵科給事中永豐軀幹美鬚髯音吐弘朗每慷慨論兵事建文君喜之壬午六月北師克都城永與陳迪卓敬戴德彝等同以奸黨逮至欲官永對曰吾王蠲耳奚以官為不屈死之



高翔

高翔朝邑人有文學節行洪武中以明經徵爲監察御史高皇帝甚眷注之所論奏無不關國家機事當上心者成祖在燕邸宿聞翔名及卽位召將大用之翔持喪服入見慟哭聲震於殿陛語多不遜乃殺之沒入其產令諸高氏產皆倍其稅曰使世世詬罵高御史也其親戚悉配爲軍又發其先墓雜犬馬骨焚灰揚之而以其地爲漏澤園

高士文

高士文咸陽人質直剛果善騎射洪武末從平內難出入戰陣累陞前軍都督僉事征交阯多効勞勩取廣源州與賊力戰而死追封建平伯

李暹

李暹字賓暘長安人生而豐偉成童端重如成人及就外傳卽知嚮學守禮祁寒甚暑未嘗求便居近闈闈未嘗入茶酒肆甫冠入鄉校祇事先生長者日留心經史洪武己卯領鄉薦入太學友天下英杰日詣高明永樂癸未授北京行部戶曹主事十年以事左遷苑馬寺清河監副以薦使西域凡五往返不辱國命每回朝輒蒙恩賜宣德初大臣以公正廉能薦提



督京倉正統初擢通政使母憂去任以孝聞服闋還職兼理通州直沽倉及象馬草芻歷陞侍郎筮仕戶曹及調戶部文移精核會稽明白受知於大司徒嘗稱其公勤明慎以勵司屬在清河監上言更牧地爲法司所核嚴法鞫之終不易辭卒如所言孳牧有效提督京倉夙夜在公未嘗以風雪寒暑少懈嚴以制下不容請託官屬敬憚不敢爲欺弊於是輸粟者無留難受廩者皆精完蒙其惠者以得瞻威望爲喜年七十方欲請老章未上會陝右計議軍儲屯田久無實效特命之經理受命之日躍然自喜促期而行忽

遘疾遂不救疾革連呼曰糧儲糧儲無一言及家事訃聞詔遣禮官諭祭命有司營葬

張賢

張賢鄠縣人永樂中鄉舉授吏部司務遷驗封司郎中超拜山西右布政使致仕性鯁直居官應物一以誠篤爲本其清苦尤人所難

周彧

周彧朝邑人永樂中以明經徵爲給事中陞通政使彧剛直敢言有論劾必着緋衣諸大臣每早使人候彧長安門外見彧緋衣各令取素衣角帶爲待罪具

當視朝果有論糺糺者必得罪久之貴近多忌或有  
譖或貪者上怒或下獄死命籍其家惟襲布斗粟  
而已召或妻問曰縱或廉無俸金耶妻曰或俸金寄  
通政司庫已而司上或庫金上悟立誅譖者以金  
給或家命喪所過致祭復其官

林嵩

林嵩邠州人國子生任監察御史成祖渡江言事  
忤旨謫戍廣西交趾叛以嵩往征之事平授交州府  
同知秩滿改河間府陞戶部郎中江西叅政入見乞  
致仕許之未幾交人復叛有詔起用比至卒

李錫

李錫字天祿咸寧人永樂戊子中陝西解首明年會  
試禮部中乙榜授蒲州學正己亥九載滿獻績來朝  
陞行在吏科給事中壬寅丁父憂洪熙改元冬制終  
轉禮科宣德辛亥遷右通議乙卯陞右通政正統癸  
亥轉左通政甲子陞通政使景泰壬申加太子少保  
癸酉以風疾休政歸錫自幼穎敏過人見者竒之既  
長爲弟子員苦志勤力昕夕匪懈不事浮華不近聲  
色爲學正時毅然以師道自居凡教人立心制行皆  
以身先之故出其門者成器而足用爲黃門時整飭

典雅小心縝密得近臣體在通政時封駁章奏通達  
下情雖倥傯繁劇而井井有條無壅滯之弊又不以  
苛察爲明卓有大臣德量以至閑家應世無一不得  
其宜入官四十餘年歷事五朝初無小過可紀身榮  
存歿令德考終福祚亦云醇備矣

段信

段信字宗貫三原人穎悟有氣節正統丙辰進士歷  
任監察御史尋陞右僉都御史守紫荆關北虜入寇  
落職移守倒馬關極力捍禦邊境賴寧 上嘉其功  
起大理左寺丞卒于官

楊鼎

楊鼎字宗器咸寧縣人正統己未會試第一廷試進  
士及第授翰林院編修詔簡講讀以下有才器者十  
人進學東閣鼎居其一修五倫書預校勘十四年北  
虜犯順命慎選諸司有治才者分守要地鼎改御史  
蒞兗州振勵有法事平復舊職陞侍讀兼左春坊左  
中允同考禮部會試尋陞戶部右侍郎天順改元陞  
左侍郎中貴牛玉諭旨欲轉江南折糧銀入實內帑  
而以他物充武職俸鼎從容開諭乃已牛馬羊房草  
缺議欲徵什二鼎俱以民艱沮之成化戊子陞尚書

延綏用兵欲預徵邊餉鼎言黃河漢唐漕運故道其間雖稍險然三門而上小河可達延綏者尚在苟貯糧水次遡流徐運何所不濟疏上且請身督之竟齟干議不果進太子少保居數年因言者乞致仕許之降勅給驛舟仍給月廩歲夫終其身卒年七十七贈太子太保謚莊敏賜祭葬鼎雋異不羣清修苦學善談論初試禮部不第例入監聞南監學規整肅獨請就之大爲祭酒陳敬宗所敬禮在翰林迥然自異於人及遷戶部掌國計最久然性頗執泥不盡合於時宜前後僚屬多不厭服云子五人時暢亦登進士爲翰林院檢討時敷領鄉薦爲兵部司務

王恕

王恕字宗貫三原縣人生而魁偉高岸音吐如鐘見者異之正統壬戌登進士選爲庶吉士授大理寺評事歷左寺副操履剛正人不敢干以私於奏當之成原情比律犁然當人心未幾陞揚州府知府屢辯疑獄歲饑發廩不俟報且給醫藥多所全活作資政書院教郡子弟科不乏人天順間遷江西右布政使比至磊落洞達遇事敢爲苟有便於民者毅然主之無少顧忌而操履矜然不入義外一錢久之轉河南左

布政使成化元年陞右副都御史撫治南陽時南陽  
豪爭礦殺人恕獲其渠魁餘悉解散以內艱去會襄  
陽盜起 詔恕起復會兵搗其巢走之及劉千斤輩  
作亂恕亦會王師平之遂 勅巡撫河南進左副都  
御史風采凜凜有所興革兵民甚宜丁憂起刑部左  
侍郎總理河道恕躬視上下僉稽衆論具奏揚州一  
帶河道南臨大江北抵長淮別無泉源止藉高郵邵  
伯等湖所積雨水接濟湖面而河身比之湖身頗高  
每遇乾旱則河輒淺澁不能行舟若將河身濬深三  
尺遇旱亦可不阻又於高郵湖自杭家嘴至張家溝

南北三十餘里濬深三尺濶十二丈取以爲外堤就  
將內堤原有減水閘三座改作通水橋洞接引湖水  
以內行船仍於外堤造減水閘三座以接水利雖遇  
風濤亦無覆溺疏入允行之九年改南京戶部左侍  
郎十二年會雲南夷獠爲梗改左副都御史巡撫其  
地時鎮守內官私市外夷誅求無厭恕劾之其下郭  
英懼而自盡沒其寶石於官并械送數人於京且勸  
上不寶異物凡花木禽獸寶玩宜一切拒絕有駕  
帖下郎中鍾蕃所恕言舊例駕帖下諸司司禮監印  
刑科號 皇門諸司關防今皆無之何以爲信設駕

帖有 賜死者其人將何如又言昔交趾鎮守非人  
致一方陷沒騰衝啓釁致麓賊叛逆今日之事殆有  
甚焉在雲南九閱月疏二十上由是直聲動天下進  
都察院右都御史十三年改南京都察院叅贊軍務  
進兵部尚書同事者忌之改巡撫南直恕以近年貢  
獻太多所在騷擾中官王敬乘傳東南搜索竒玩所  
至驚懼恕言當此凶歲謂宜遣使賑濟而乃橫求玩  
好令其失人心損國體傷和氣而召災沴乎 上詔  
械敬下獄同惡王臣斬於市中外稱快謂恕有回天  
之力壬寅松江大饑斗米百錢恕出粟減價以糶全

劉仲文

活甚衆仍轉南京兵部尚書叅贊機務刑部員外郎  
林俊以諫下獄經歷張黻救之亦下獄恕言二人志  
在進忠而得罪恐人自此以言爲諱設有奸邪誤國  
誰復爲 朝廷言者俄有 旨令致仕恕怡然就道  
會星變庶吉士鄒智等抗論萬安劉吉天下之小人  
王恕彭韶天下之君子乞黜萬安劉吉而用王恕彭  
韶疏入不報時 孝宗在東宮素聞恕名及卽位太  
監懷恩以忠直起自謫所首奏恕於 上言官又交  
章首薦遂 召爲吏部尚書劉吉深銜之及恕在吏  
部裁抑僥倖褒獎名節甄拔淹滯中貴無敢以私干

吉代萬安專政每有所軒輊恕亦憫憫不撓守備蔣琮與南京科道相訐奏吉票給事中方向等貶謫殆盡琮自如恕言官中府中俱爲一體陟罰臧否不宜異同壽州知州劉槩考滿來京與御史楊彙議時政槩與彙言夢一人騎牛背上陷澤中公左手把五色石子右手提牛角引入正路其人謝而去蓋人騎牛背正我朝姓名惟五色石子不可曉意者公首抗疏論時政爲彈之第一義耶彙嘗劾內閣附內閣者發其事下獄彙以受槩餽遺誹謗朝政發衛充軍槩比擬造妖言者律罪至死恕上言槩之書詞固爲狂妄

其夢有無亦未可知然初無惑衆亂民之心今使槩死於獄中豈不大傷天和也哉卒得減死又徽王乞陞鈞州爲府與夫工完乞恩濫賞內官監力論止之兩廣都御史秦紘奏安遠侯柳景不法事坐致仕恕極言柳景當追賊之聖恩免之矣而恩不及於秦紘是爲地方軍民之害者可恕而除地方軍民之害者不可用其何將以服人心而勵將來乃起爲戶部尚書內旨以通政司經歷高祿爲本司叅議上言祿出自科目自可遠到越次超陞恐非所以愛之唯勿以親戚妨公議事乃止時有建白多謂業已行矣恕

言天下事設未得其當雖十易之不爲害若謂已行無及則古之納諫如流豈皆未行乎遇事輒言有不合卽引疾求退 上每溫詔留之但執政擠忌日深明示沮抑恕以不得其職屢疏辯明求退及吉去位執政丘濬又不悅之恕不自安求去益力始准致仕言者譁然屢奏起之不果恕歸優游山林著述不輟以正德二年卒贈太師謚端毅子承裕爲戶部侍郎

邢簡

邢簡字居敬咸寧縣人少力學有志尚登正統壬戌進士第授刑部主事擢真定府知府真定畿內劇郡畚漢官軍雜處勳戚豪右占據民田譁訟紛沓簡處之有道上下安之以薦陞浙江左叅政尋轉順天府府尹京邑供億繁重簡力爲裁省十去五六陞南京大理寺卿尋徵拜戶部侍郎端午侍 駕閱武于萬歲山之陽忽疾作急扶歸抵家而卒簡爲人廉介有守蒞政彊明與人交坦然無矯言飾行卒之日囊無餘資惜之者無間言

姚顯

姚顯字微之咸陽人正統甲子鄉舉卒業太學時上疏言王振竭生民膏血修大興隆寺極爲壯麗車駕



不特臨幸夫佛本夷狄之人信之得禍若梁武帝者足爲前轍之鑒請自後內臣修葺寺院悉行拆毀以備倉廩之用勿復興作爲萬世法不報後至太僕丞

宋欽

宋欽字克敬乾州人正統十年進士授大理寺評事歷陞福建按察司僉事四川副使征大埧賊有功受織衣銀牌之賜轉河南按察使尋擢右僉都御史巡撫貴州陞南京大理寺卿累疏乞致仕許之加資政大夫尋卒贈刑部尚書賜祭葬如例欽居官以廉慎稱精于法比乞休疏凡十餘上始終之際有可觀者

趙謚

趙謚字子安號真齋涇陽人正統甲子鄉舉第一人景泰辛未進士授南京戶部主事陞員外郎母服闋轉兵部未幾有江西之擢在戶部時兵儲告乏勅謚往督至則飛章劾少司徒及中貴人專恣罪不少徇又徽州積有逋租官嚴刑莫能徵往諭以禮法民立輸無敢後者在江西守法奉公行郡縣不憚寒暑險途未嘗敢以私謁性甚孝友母太安人王氏訃聞號痛幾絕廬墓側淡食草寢者八載旦夕哭奠哀如初喪嘗有慈烏飛遶其傍不去盜旣得其家貲後因感

悟悉歸之且皆改行焉有司以聞詔旌異之曰員外郎趙謚孝行之門兄弟以父母俱棄圖分異謚泣止之不能則盡以所遺貲產讓之從兄子二人貧不能為室代為之聘歲薦饑鄉多婚葬失時者竭力濟之無慮四五十人封治母墓側荒塚亦十七八所成化六年卒壽五十有八官凜貞介里播仁聲卓然盛世之名人云

李錦

李錦字在中號介庵咸寧人九歲失恃依安成舅氏為擇師教之端坐終日不逐羣兒嬉戲讀書已知大

義還為諸生受易於董生益肆力於學後遇秦州周廷芳講學得聞周程張朱為學之要遂棄記誦辭章之習專以主教窮理為事又與西郭姚氏渭南薛氏麗澤講習善則相告過則相規知行並進久之踐履益醇關中學者咸敬服如宋人之於橫渠云登天順壬午鄉舉入太學為邢祭酒讓所重令諸子受學諸子稍不恭輒遣去後邢坐事下獄錦率眾抗章明其無罪事親色養執喪盡禮不作佛事士大夫家至今遵行風俗為之一變所居僅蔽風雨茹淡服疏至於屢空臨財終無苟取周先生嘗難之曰有人親病劇



思食一梨求諸市不得隣人有種者非竊不獲將竊之乎錦曰辱身以及其親非孝也周歎曰在中可謂立身頗揚者矣其解經極平正通達不爲鑿說且善誘後學諄諄忘倦出其門者多名士及任松江府同知職親戎牒奸無所售有脫役四十載者卽令補伍乃爲官守所拘不究厥施卒於官骸骨不能歸其僚友賻之乃得歸云

### 東思忠

東思忠字廷伯華州人生而岐嶷少而穎悟十二遊太學每祀則齋潔入廟凡俎豆樂舞之屬莫不備問

而具識之退而曰禮云樂云固如此其所用心豈尋常能測哉讀書爲文雖長老莫不畏避弱冠遴爲州學生中天順壬午鄉試成化丙戌登進士拜刑部河南司主事剖斷明決不避權要尋轉雲南司員外郎郎中被命審錄畿內刑獄平反爲多惡有所畏寬有所白居刑部以端正自居因情亮事曾未一用慘酷刑具而犯者自不能不以隱曲備對嘗曰獄有微旨非敲朴所能致也每於招稿面題曰得情勿喜及據案正法則又曰罪疑惟輕一時危疑之獄皆就決焉兩擢府丞不報遂轉四川按察司副使整飭松潘

兵備壘書凡一切畚賊出沒軍民利病悉聽從便處  
置至則立約束謹烽燧內修政事外樹兵威諸畚部  
落畏威懷德不敢侵邊然松潘孤寓萬山而諸畚部  
曲環列蝟蟻中留一綫之路爲轉輸往來斗米之價  
每至數金方辨故輒數倍他邊而主藏之吏多伸縮  
監司又因循罔稽由是吏奸民苦日甚一日於是苦  
心勞慮滌弊正法倉庾之積陳陳相因矣又嚴減尅  
之禁正私鬻之罰茶馬有序瑕釁不生士有飽食官  
息科斂兵士駸駸生氣焉又於大石佛嘴鑿山開路  
以便轉輸人至今宜之成化甲辰惡族逆命出軍勦  
之直抵巢穴斬首四十餘級 上賜白金綵幣乙巳  
小寨畚竊發又出軍勦之斬首三十餘級所獲軍器  
頭畜無算曰此士卒之功也悉以賞之捷聞又 賜  
如前於是軍威大振諸部矢心歸順其酋長及朔望  
輒來稟受約束蜀中士民倚爲西北長城矣是歲十  
有一月以疾卒於官享年纔四十五爾惜哉

張鼎

張鼎字大器咸寧人成化二年進士授刑部主事歷  
員外郎知太原府山西叅政河南按察使都察院右  
僉都御史巡撫保定等府召爲戶部右侍郎以疾乞

歸卒訃聞賜祭葬如例鼎幼受業於河東薛文清公  
有理學名知太原有惠政民懷之至巡撫保定則令  
各府沿路築墻以禦盜賊衝突修繕煩勞民頗怨謗  
然至今旅人賴之爲永利焉

韓紹宗

韓紹宗字裕後號蓮峰西安府朝邑縣人成化五年  
進士授刑部主事歷員外郎中九年持法惟謹一無  
所徇都指揮王章守備真定橫甚御史柯忠劾奏章  
章亦誣奏御史 詔往勘而章有內援請託紛至竟  
按其罪免官大璫石巖鎮守大同與都御史許進相

訐奏命給事同紹宗往勘紹宗廉其實力直都御史  
巖深嫉之奏言紹宗黨都御史 天子震怒逮繫獄  
久之事白得釋宗師有僧善中貴梁昉稱曰門僧一  
日出而衝定襄伯前導市撻之僧倚昉奏誣定襄下  
于獄自匿昉所紹宗竟追捕寘于法一時京師有不  
畏科道而畏韓郎中者以紹宗之剛正無慾故也遷  
福建副使凡七年郡邑吏以法問罷及所聽斷平反  
者不可殫紀會以內艱歸遂卒

雍泰

雍泰字世隆咸寧人成化五年進士授吳縣知縣吳

濱湖湖漲淪田千頃作堤障之民受其利稱雍公堤  
吳民有妾亡者妾父訟其夫密殺吾女兩月匿屍湖  
中石下召訊夫夫曰妾逃兩月踪跡不可得妾父脅  
財始知死所使人視其屍乃訊父曰夫密殺汝女汝  
安知匿於石下此又豈兩月屍耶此必非汝女汝殺  
他人女冀得賂耳一訊而服十年召爲監察御史吳  
人富而好饋行泰不受一錢巡鹽兩淮淮竈丁貧而  
鰥者幾二千人巡滿俱與完室歷陞浙江右布政使  
時勢家鬻販私鹽鄉人效尤幾至千輩盜竊橫行乃  
先收勢家人抵罪於是羣盜悉平爲都御史巡撫宣  
府叅將李稽不法部下狀其惡具草且聞稽跪堂下  
乞受責圖自新泰曰此亦軍法也縛下杖之三軍股  
栗稽乃譖之於朝稽爲時相李東陽姪也言官遂劾  
泰以擅辱將官罷退居韋曲別墅不涉城市正德二  
年給事中潘鐸薦泰有敢死之節克亂之才詔起左  
副都御史操江固辭弗允未幾陞南京戶部尚書時  
逆瑾用事以泰鄉人欲親暱之卒不應遂斥去仍罰  
米千石輸宣府而諸所嘗薦者鈞陽靈寶皆獲罪歸  
復居韋曲日焚香讀書與鄉人論穡事不與上官相  
見族黨有犯必告有司曰某是某非幸無以泰故屈

法年八十卒

張曉

張曉字光曙三原人成化己丑進士知襄垣縣政平  
訟理召拜監察御史上書論萬貴妃事同列讀其辭  
皆縮舌上笞而釋之出爲湖廣僉事施州夷亂諸  
僚莫敢往曉請行曰此不可以兵加當以義動至則  
宣朝廷威德諸夷感服陞河南副使時河決黃陵岡  
泛汴宋曉奉命督役導河幾千里俾復故道工竣勞  
以幣鑑進按察使陳州有告歐死少年者三年莫能  
決曉閱屍圖驚曰安有少年而缺其齒乎訊之果捕  
得少年其屍乃一乞嫗也事遂白人稱神明尋以憂  
歸

李崧

李崧字世瞻別號靜庵臨潼人生有穎資年十八補  
郡庠生大爲郡守余肅敏公所重嘗贈以詩有曾向  
關中試白眉之句中成化乙酉鄉試己丑進士初除  
山西屯留知縣屯留難治在積滑舞文弄法上欺官  
府下虐良善十數年來獄訟錢糧皆出其手至則先  
按其奸弊得十餘人悉捶死之而縣治始清法令不  
擾強良畏如神明良善親如父母在縣三年一毫不

取廉名四振至興學校修禮樂正風俗時婚娶治行  
爲天下第一陞戶部河南司主事轉山西司員外郎  
郎中在部十二年除積弊革奸猾錢穀出納一毫不  
爽一時居部者無出其右名動京師陞廬州府知府  
治廬州如治屯留而法令稍寬詞訟兵甲錢穀無不  
克舉賑荒救饑所活萬餘人民不憂旱蝗不入境立  
俵馬之法定鹽鈔之價創河橋以免民溺廣積穀以  
備賑貸撫按交薦聲譽赫然陞河南左叅政去任之  
日百姓遮道泣留立碑頌德甲寅丁外艱服闋除山  
東右叅政未及任丁繼母憂服闋將起而病作不起  
矣崙貌不踰中人至判大事決大疑嶽峙峽流沛乎  
有一介不取之廉萬方無敵之勇朝野之人咸想望  
其丰采焉

楊時暢

楊時暢字知休咸寧縣人尚書鼎之子也成化戊戌  
進士改翰林院庶吉士授檢討弘治初與修 憲廟  
實錄書成陞修撰未幾充經筵講官同考禮部會試  
詔選 東宮官屬吏部尚書馬文升以時暢薦改右  
春坊右贊善秩滿陞左春坊左諭德典成再遷侍講  
學士正德改元以 東宮講讀恩陞太常寺少卿仍





兼侍講學士尋卒時暢美風儀善談論居家以孝友聞爲大臣子多識國朝典故及前輩遺事有幹濟才未及用而卒

張鸞

張鸞字應祥咸寧人也舉成化戊子鄉試辛丑舉進士爲大名知縣是時縣中百物俱廢倉廩空虛奸豪侮法又衛河每漲而瀕水諸田盡爲之沒百姓患苦之至則修墜補敝誅鋤豪強積穀備凶幾萬石築堤捍水不害耕作詞訟清理遠近稱爲廉平時寧山衛胡指揮者妾如甚家人疾之胡死其子誣其妾毒之

獄成鸞訊得其情妾以無死先是都御史侶鍾調鸞令南樂大名民伏闕奏留得不調至是銓部竟調之而南樂歲旱民饑流亾過半乃請于都御史得二千金請于大名府得六百金又請于賑濟郎中得穀若干石設法賑貸民以獲蘇矣而後崇道興化培養茂異綜理其馬政馬政修舉三載考績徵拜山西道御史權稅通州尋視茂陵役徒丁繼母喪歸復其官巡視居庸諸關從容言便宜事謂軍士糧餉于他處守支不便而傳警缺馬皆非養士禦患之宜條議部置咸當事機疏上隨下戶兵二部議報可及代復督稅

通濟白河無何出按四川務持大體不矯激立名簡  
廉貪而激揚之人人當于功實而又裁省浮費飭理  
兵戎修繕城池興作庠序表章忠節推舉隱逸先後  
奏議以松潘諸處及成都諸郡縣何地宜添設何員  
宜裁革卓然皆爲經遠之績焉歸而總憲屠公瀟委  
以掌諸道奏事戊午冬清寧宮災奏上八事其一曰  
法司修纂條例宜早完輯以省刑罰二曰言事諸臣  
宜優容以開廣言路三曰巡撫都御史宜量材授任  
邊陲與內郡異未可一槩推予四曰濫放俸金五曰  
優恤小民六曰明慎用刑七曰行取差官八曰量減

抽分 敬皇帝爲罷行之陞浙江按察副使巡視海  
道經畫六年百務具舉倭寇遠遁海道肅清超遷大  
理寺右少卿時鎮守河南劉太監與周王訐奏諸不  
法事奉 詔案問具得其事以報犒寶鈔羊酒尋轉  
左少卿陞左僉都御史理院事御史王公時中巡按  
大同忤權貴人怒欲置之死力解救之巨璫張璿掠  
奪民產反奏言豐潤皇莊累苦百姓侵漁徃勘事得  
直田產還之民轉右副都御史仍理院事尋復拜大  
理寺卿得侍經筵與修資治通鑑成得賜 御製寫  
懷迴文諸詩復轉刑部左侍郎曩在大理時會案牘

委積一切皆自理積勞傷目至是疾愈甚竟以失明  
乞骸骨歸田不許久之以事忤瑾得致仕歸旣歸而  
瑾怒不止罰米二百石輸于邊于是杜門蔬食以儉  
爲師晚好杜甫詩命兒子吟誦其側日聽以自娛辛  
未秋病目復明又九年而已卯夏終于正寢詎生壽  
七十有四訃聞天子諭祭命有司營葬事

劉璣

劉璣字用齊號近山咸寧人爲兒時游鄉塾卽端重  
不嬉戲塾師異之曰是兒骨相不凡後當名世戴恭  
簡公督學見其文特器之以補諸生成化廩子舉鄉

試第二人明年登進士授山西曲沃知縣至則砥苦  
節敦古道期年邑人向化曲沃產棗視事多以棗贖  
罪遂儲棗數萬計後歲大侵賑粟不繼卽繼以棗民  
賴不饑民有共貲而掊利者訟于邑璣曰汝聞管鮑  
分金事乎訟者慚乃委金願輸官爲平遣之其專務  
德化不尚法令類此他若疏夢泉均景水寬刑罰平  
差遣廣儲蓄恤災獨諸善政不可縷紀是時曲沃治  
行爲天下最入爲戶部主事未幾督餉大同道過曲  
沃人聞其來扶老攜幼迎謁道左留邑數日而去戊  
午陞江西瑞州府知府瑞故曠郡無城郭依山聚居

民狂悍善劫郡人苦之璣視郡首著勸諭文繪善惡  
圖標揭境內賊黨稍稍解散賊周黨狂悖率兵撫禦  
之賊奄至擁歸其寨旣乃召其魁諭以禍福賊乃羅  
拜堂下已乃治具享璣蓐食酣飲夜就寢坦腹睡斲  
斲賊衆環聽相語曰劉公大人也我輩不復敢爲惡  
矣居三日乃還郡境內寧謐遂興學正俗表節崇讓  
均賦薄稅節用省刑期年瑞乃大治辛酉朝覲量移  
九江府瑞民思其惠愛立三太守祠至九江僅踰月  
丁母夫人憂歸是時虎谷王公督學陝西倡明道學  
延居正學書院講諭性理三秦學士翕然宗之甲子

復除湖廣衡州府知府衡薦饑適疫作下車禱神修  
祀施藥賑食孜孜若不及民賴以存時過石鼓書院  
爲諸生談說經史及性理諸書衡士喜曰我輩今日  
復從朱張游矣正德丁卯雍王薨於衡 朝廷遣太  
監護喪還京師時劉瑾用事閹人怙勢掠賄至衡見  
璣首以禍言恐動繼卽大需供億時時戒曰王樞某  
日行舟及楫師挽夫諸所供給其宿具且無煩民否  
則罪不貸璣唯唯至期舟備篙師良挽夫健且溢其  
數人各負米鹽槁魚備需於湘滸吏人唱名執役無  
煩呼促中貴黃異之以問役人對曰府官聞貴人來

業已先三月儲之矣黃曰幹事愛民若此耶真賢太守也戒僕從毋需索黃至京覲劉瑾首以璣治衡善政對時瑾用人多以賄遷臺諫恒以爲言旣聞黃之言乃獨用璣以塞羣議遂擢太僕寺少卿去衡衡人德之樹棹楔表遺愛云明年戊辰陞太常寺卿提督四夷館無何陞戶部左侍郎卽又陞尚書屢疏懇辭曰臣由知府轉少卿已爲殊遷由少卿數月而陞卿由卿而累遷尚書 祖宗任官確有定式今若此是使成憲由臣而毀 陛下縱眷臣其如祖宗之法何臣死不敢就疏屢上不允乃赴部視事尋以例侍經

劉敞

筵賜楮鏹千貫尋又賜玉帶并御製諸詩十六幅貞觀政要六部瑾方擢用時意必德已及璣至素節自守意稍悔之然以人望所屬必欲引以自飾而乃益自韜晦每朝退署部畢卽閉門縱飲酣卧不醒瑾欲延問率醉不能起他日瑾勝氣詰之曰氣弱非酒不能支且嗜睡不睡則病由是益疎遠矣瑾性好紛更璣於部事遵舊不易瑾殊不悅嘗力論時宜變更璣曰 祖宗立法盡美盡善行之萬世無弊亦惟不愆不怠率由舊章而已是時瑾急賄自封巧宦者多重輦以通致璣從容語瑾曰飲食以養生過則傷生貨

財亦然是故貨也者禍也古人戒積藏畏其禍也瑾積憤不附已欲改南京禮部又欲援國初例出爲布政使尋事敗不果瑾敗璣乃上疏自劾曰臣與劉瑾實同鄉里誤被引用驟遷顯官今瑾事敗臣罪當誅戮文上雅知廉靜方直不爲瑾用特准致仕旣歸里無華屋野無腴田囊無羨金緼袍脫粟泊然一布衣也居鄉二十餘年耕讀自樂與人接油油然惟恐有傷而中操介削屹不可移雖不謝絕公府然卒無所干預故人益敬重之晚年恬放自適多從鄉人飲飲輒盡量醉爲歌詩皆發性情有淵明之遺意焉卒之

日雷風晦冥聞者慟悼訃聞遣官諭祭二壇有司管葬璣爲戶部時尚未製緋袍冬月朝會公卿皆緋紵璣獨服紗至部視事過午堂食止市餅四枚茶一盃耳時劉瑾行賄天下諸司當朝覲入京多賚重寶以賄當路璣獨漠然一日有人扣門餽玉珮帶適璣當門怪問其何由以至餽者大驚踈趨去曰我以為吏部劉宅是戶部劉宅邪又當時諸公卿過瑾所率庭叅璣獨以禮自持不少貶屈數事至今尚爲人所稱說焉

屈直

屈直字道伸別號西溪華陰人初生之夕父夢日出  
大如輪紅光異常流入于懷驚覺而生天性聰敏過  
人七歲時口授以詩歌及大小學卽記憶不忘稍長  
就師手不釋卷成化乙未充邑庠生浮梁戴恭簡公  
深加獎譽秋遂中試甲辰登進士秋丁內艱適歲大  
饑絕糧直謁推官乞賑推官以囚二人將論邊戍居  
間可得厚貲直曰在使君高義則可直則進身之初  
當清白自勵賑公道可受賂援罪人則不可矧又傷  
使君之公哉推官嘆服丁未授刑部主事員外郎郎  
中故部獄卒往往厚索要囚稍不如意輒縊殺之直

黜獄事卒白鑑縊殺一囚是夜夢囚訴卒明旦根治  
得狀白于尚書曰要囚也姑置之直持不可卒論如  
法自是卒無敢殺囚者錦衣奸人依憑權勢郡縣上  
賦至輒局誘代納號稱攬頭往往負苦解人多令破  
產有數攬頭發覺直白尚書按治尚書不許直固請  
及逮繫攬頭權勢人果邀奪之尚書聞之且以直爲  
歛怨生事直入朝言於錦衣曰錦衣朝廷爪牙乃不  
容刑官守法耶錦衣懼竟出諸犯徵其賦俱抵之罪  
尚書復大喜遠東巡撫與武定伯交惡直奉詔勘問  
直巡撫而抵武定以法權貴人憚之歛不敢恣丙辰

陞重慶知府士官軍衛雜處其地富庶謗議易生自有知府以來無見任陞遷者直既拜命人或慮之曰盡其在我陞遷何足較既視事吏持簿呈請征需約可八千金直歎曰小民營利爲生何預於官而爲此橫斂耶取簿付之火府南妖擲輒石毀人房屋時有火災直齋沐告於城隍妖火遂息境內旱禾稼枯直將禱於真武山是日天甚晴明啟行忽有白雲如蓋往返隨之既而大雨如注歲則大熟於是鄉士大夫有三異贈卷守重慶凡九年六事孔修四境安又倉庫有餘羨之積囹圄無留滯之囚乙丑陞河南叅政永城縣楊姓者爲豪族誣告得狀治豪族罪楊氏獲伸正德丁卯陞浙江按察使鞫問糾治一以至公處之非約自持門無私謁法無枉縱一方澄清司禮監巨璫劉籍故都御史錢公鉞家未至直已陞河南布政將之任劉璫至怒甚衆懼莫知所爲直笑而言曰朝廷之下衙門最大者內府司禮監天子之下內臣最尊者蟒衣玉帶太監我輩豈敢不敬第不知見怒得何罪也劉璫卽改容曰憲長好人援直手揖衆入坐衆謂旣不激劉怒又不瀆甚得不惡而嚴之方初至浙巡按欲懲司吏直曰事不集大抵皆官也乞寬



三月事尚爾豈惟吏官亦當論巡按罷懲不待期而報完甫至河南陞太僕寺卿太僕寺馬利近倖相沿爲奇貨地包攬代納請託苞苴百計求中至郡縣亦歲有常例馬多不堪直力禁革之太僕爲之肅清近倖不悅乃相與共譖于權瑾瑾令邏者偵察盡得其情乃謂人曰屈某好官太僕官久習汗濁今別是一衙門也諸譖不行遷南京操江都御史復改南京大理卿多所平反未幾復改漕運都御史直以運船多稽遲置方眼簿給付運官日記所運水程及阻風守淺時日備查考其法至今用之將上京議事山陽知縣餽銀器一卓曰舊例也直曰是何憲綱所載責知縣叱出初當道與藍田南氏有故怨直連姻南氏又爲按察時某御史爲歸安令民告其科斂至萬金按治之令懷白金三百餽求解叱却之按治益急而直陞河南令事得解及今爲御史起復赴京至淮安謁于漕府執屬官禮甚恭直喜宴談及浙事偶忘其爲某御史也因言平生未嘗苟取如浙屬一知縣餽金求解當時叱出及今猶耿耿不知其人何如也某御史色沮愈恭直怪之及罷會諦思之則某御史也遂肆意傾擠直屢疏致仕以歸直毅而有謀剛而不虐

才敏而力足以行之故宦迹所至皆有聲與人言侃侃無隱亦以此得罪於人里居以來二十年耕讀不倦嘗身親農事手披載籍為子弟式雖官至大臣非慶賀大賓客未嘗衣錦於人無貴賤謙謙致禮無少慢事樸庵年九十卒直年七十哀毀皆如禮直弟泰寓京感時疾直親視湯藥家人以傳染諫曰兄弟至親豈得相避忌哉時有名醫然難致跪於門醫感而至謝禮亦不受曰公為友愛人某獨不得為義人耶嘉靖丁亥奉詔進階總制尚書王公疏薦起用不果年七十四一疾不起訃聞 上遣官諭祭營葬

康海

康海字德涵武功人弘治初舉進士第一議者謂其廷試策為本朝第一本朝文章至成化末益庸靡海既有俊才遂與何李邊王輩興起為古文扶衰拔溺有力焉然性豪放不閑小禮恃才凌駕人人多忌之會劉瑾惡李夢陽海與夢陽善因往說瑾以脫夢陽及瑾敗人遂指海為瑾黨罷去不復用海益縱聲妓恣游山水讀書為文立名于時故海雖廢而名益著彭幸庵嘗欲薦之海答書以見意曰僕自庚午蒙詔之後即放蕩形志雖飲酒不多而日與醕酎為伍人

間百事一切置之蓋素性疎懶偶因官秩羈繫數年  
若招豚繫鷹而一旦得此中心之快實有人所不知  
而已獨知之者自東方多事以來聞其驍傲無狀如  
彼卽或奮然有攘臂之意隨復自笑以爲狂奴猶爾  
卽又飲酒散髮箕踞林麓此其性習之已成雖三公  
之貴刀鋸之辱不可奪也况數石之粟半幅之紙乎  
僕自幼支謾無狀性好是古以非今始仕時望見  
先皇帝寬仁大度卽自私擬以爲臯夔稷契之業可  
以復見于今而狂放易言略不修飾至 今上嗣位  
之後又見其英毅果斷益喜自負以爲鄙志當究于

徐相

此一時交與之士反覆輕易不檢惟僕言是狗故謾  
論譏說略無忌畏日就月將幾踵奇禍幸免殺身而  
歸而二三者又補砌所無以爲真有使僕含垢于有  
罪者之籍與不肖之人同被驅放上辱兩朝作養之  
恩下累先人蠲介之業生平微志付之穢塗情苦心  
局不復自愛暇日偶讀皇甫規避梁冀之事與蔡雖  
却九錫之書喟然嘆曰彼何獨不得含垢冒汚而成  
致美節如此也又偶讀柳宗元傳曰卽宗元有不同  
于叔文然親與之交而受其職任矣夫身有規雖之  
操而迹厠宗元與九錫之間仁人志士宜于此何如

也今僕所憂者在忽有犬馬之疾死丘壑之下不得伸其夙心原悰耳而區區官秩之事非所念慮也瑾之用事也蓋嘗數以崇秩誘我矣當是時持數千金壽瑾者不能得一級而彼自區區于我我固能談笑而卻之使饕餮嚙噉之人卒不加于我此其心與事亦雄且甚矣當朝大臣蓋皆耳聞目見而孰知其然方臺諫論列之際出于一時倉卒未暇差別而今則又數年矣夫伊尹之輔商也一夫之不獲則曰時予之辜僕卽非賢者然豈少于商之一夫哉大臣者乃忍使之雜于孫聰曹元輩間耶故鄙人之心至此益放益懶披髮嘯歌至于終身而不敢悔此非甘心爲長沮桀溺之徒也公之義曰古人內舉不避親時之可舉不可舉非僕所知也而僕之污穢亦非公應舉之人觀近臣者以其所爲主于此使識者苟爲之言則所係于公者豈細哉今僕之不可于當世者有五而甚不宜出就官秩者有二性喜嫉惡而不能加詳聞人之惡輒大罵不已今諸公者皆喜明遜而陰譏此一不可翰林雖皆北面事君而勤渠閣老門下者以爲賢能僕懶放畏出歲不能一造其戶此二不可人皆好修飾文詐僞恭假直而僕喜面訐人未有不

怒者此三不可士大夫不務修身立政而俱呻吟詩  
文以爲高業見其詩若文不能不怒故見輒有言而  
彼方望我以爲美也我以言加之此四不可與相好  
者接必因其職事加勉戒之詞多忤其所好彼或未  
從卽拒而絕之以此親疎多怨苟復見其所愛者又  
不忍不告或又告之彼卽又不從而僕又絕之此五  
不可執德不宏不能信之于人雖頗自好而當世談  
論之士多加詆謗自入有罪者之籍污穢終身莫能  
自潔使平日所立之志扃閉淪落智高萬物之上而  
名陷九淵之下于中夜竊自嘆悔不當輕易效慕世

俗科舉徇外構此兇溺今又不傲而欲仕乎此甚不  
宜出者一時同黜之人固有不幸而被污者然罪大  
惡極羞談于婦人女子之口尚十之九彼莫不覬幸  
僕出以爲先容之地而當時宰執又率崇私愛而乏  
分別苟欲引其私人必援僕爲喻是所以用僕者非  
必實知其爲人而真明其有誣也如此則是以賢者  
之身而爲不肖者之資矣語有曰君子非其招不往  
以不賢人之招招賢人如之何其可往哉今衆人雖  
以不肖謂僕而僕未嘗一日不以賢君子自謂已如  
此自謂而人以彼謂已蓋所謂嘽爾而與乞人不屑

者也此甚不宜出者二明公之意特出于一時愛念之篤徇未詳究及此然言出乎口通乎心明有日月幽有鬼神此區區平素之惘可一鑒而盡者公如覺之則信其爲肝膈之實慨然憐我體我矣海年八十餘以壽終乎栗字子寬亦有異才能詩詞不第早卒

### 馬應祥

馬應祥字公順西安咸寧人自幼穎異弘治己酉舉鄉試第二人丙辰登進士觀政戶部其年秋犒金甘肅有以羨餘言者叱去秋毫無所苟明年丁巳授河內知縣河內素稱難治庶事一切頽廢租賦至數年

不完至則加意撫循之不率教者治之不妄笞一人具收戶數則躬爲編次奸吏滑胥無隙可進自是租賦完徭役均百廢興詞訟希少豪民斂跡暇則課諸生手校其課執公庭之上吏縮首重足立視其室服食器用泊如也明年以母喪歸百姓走送涕泣竟日乃始別去喪畢改任徽郡歛縣郡考亭故里雖稱文獻然俗好氣健訟好交結貴人爭地數尺起訟連年費千百金求勝不勝不止又豪家大族搖動禍福至則持之以靜事求其可不枉道以徇人久乃自定民有據險不輸賦者且五十年出榜招之日不輸賦者

坐以重役示罰于是諸租賦無敢後期至郡有殺人者久不可得先期齋戒禱越國汪公祠下日神許我得其情則雨是夜果雨翌日啓死者棺事中諸人羅跪乃一鼠自棺出鑽跪者一人衣底尋忽不見私念曰此神示也乃指其人曰殺人者汝其人色動推究果服又郊外殺一人未絕命移之縣大門內許人縱觀之乃一人嗟歎其側者久之因扼其吭遂絕乃執而抵于法蓋殺人利其財不絕恐或出語故復來扼吭耳於是縣中稱爲神明歌頌之召拜吏部稽勲主事丁卯調文選是時權貴用事旣無干謁亦不矯激

惟硜然自守旣乃厭棄求歸尚書許公勸留乃止尋陞稽勲署員外郎與尚書忤陞湖廣按察僉事督學庚午涖湖廣會當鄉試而湖山闊遠兼之卑濕於是校定諸士不能徧歷或合數處羣試之場屋事竣方施教約明年辛未言者以簡出爲辭遂改督屯河南然鑒別之精予奪之公諸士實心服焉于其去也咸惜之至河南數日復以母喪歸服闋改兵備陳睢在陳睢一年積贖罪米粟千石及數百金儲諸府庫立之卷籍以爲官需至于黜貪汚之吏革濫稅之關威令赫然行矣乃乙亥秋有詔罷陳睢兵備帶銜河南

周性

聽用於是浩然而歸吏部檄屯河南尋丁父喪起改  
山西督屯是時屯田子粒負欠三四年併徵實難謀  
諸撫按許他物相準卽以給諸士卒甫三月完者十  
之六七尋擢山西按察副使既至未久入賀卽上疏  
乞休歸里與朋好日游城東飲酒賦詩搜奇抉巧不  
驚人不已故平生文章詩所得不多然類非世俗所  
能也風流慷慨條然物表以上壽考終

薛敬之

薛敬之字顯思渭南人居止端嚴動稱古道成化初  
應貢入太學值外內艱皆跣行奔訃尺雪不避諸生

咸服其行誼後謁選授應州知州勸農桑崇學校除  
盜賊奏課第一陞金華府同知撰金華鄉賢志二年  
致仕歸

張潛

張潛字用昭號東谷華州人生而穎秀甫八歲日記  
數千言口占詩對答應如流稍長弄筆爲文輒吐奇  
語侍郎公送之學士西涯李公所從受尚書李公奇  
之甚嘗語人曰韓退之驚怪張童子不易得也乃今  
復有之成化丙午秋十有五歲矣西赴鄉試不偶益  
淬礪自負弘治壬子遂庵楊公督學關中徧試諸生





謂關中有三才子蓋慶陽李獻吉洵陽張光世其一  
潛也是秋三人同舉再試禮部丙辰春自禮部入對  
大廷俱在高第授戶部山西司主事出納錢穀關節  
不通剔抉弊蠹祁寒暑雨無少懈惰部尚書稱其廉  
能擢員外郎丁外艱服闋改禮部儀制司員外郎未  
幾擢精膳司郎中凡 朝廷大宴會及宴勞四夷經  
畫節制禮無廢闕費絕侵漁是時劉瑾用事深用避  
匿蹤踪不通或曰公鄉人也不往且有禍笑而不答  
其卓立如此已巳冬擢廣平府知府廣平附畿內三  
四年來權奸肆虐民不堪命盜起流劫郡邑不可撲  
滅多方捍禦郡中賴以無事既乃按行屬邑撫循安  
輯之省其財力均其徭賦黜舞文之吏清久滯之獄  
申庠序之教興禮讓之俗郡邑熙然治矣逾五年癸  
酉起擢山東左叅政是時工部尚書無錫秦公爲布  
政使相得甚歡凡旬宣督餉之務相與諮議而後行  
人方冀其大有爲也乃明年遭誣中以察典浩然西  
歸曰自求無歉而已潛風流蘊籍善吟咏工書華州  
山水佳勝足以自娛又常往來武功與康先生游對  
客命酒談論古今時出雅謔聽者灑然如臨皓月沐  
清風鄙吝頓消弗自覺也

尚衡

尚衡字一中同州人也四歲能誦古詩十七授尚書  
 為州學弟子二十而孤三十八舉於鄉後舉進士拜  
 工科給事中嘗出閱山海關諸路邊餉邊人誦焉乾  
 清宮災上封事十二條 敬皇帝下詔求直言乃復  
 上四事尋又奉詔陳四事其後 天子作延壽宮又  
 釐兩宮又上封事其辭曰臣聞大德必壽建塔延壽  
 無是理也陛下初即位誅戮妖僧罷法王去佛子此  
 盛德也臣愚以為事既惡於昔必不好於今定有左  
 右之人希恩信怪妄傳神異誑惑 聖聽故至此覽

奏為罷其役戶部尚書侶鍾其子受賕事覺乃劾罷  
 鍾遷吏科右給事中未幾遷戶科左給事中出閱大  
 同諸路邊餉是時虜大舉入寇 上命保國公朱輔  
 都御史史琳率眾數千人擊之師久無功於是劾奏  
 焉以忤當路遷浙江左叅議浙俗健訟日受數百牒  
 剖決如流連歲大饑賑貸活數千人嘗入賀萬壽聖  
 節會劉瑾瑾惡人高幘或勸其勿高幘者不聽其自  
 立類如此遷浙江左叅政復改山西分蒞河東道居  
 平陽平陽多藩邸其下多馮藉以攘取民下車禁止  
 盜王常聚眾西山設計擒殺常散其餘黨後乃移守



冀寧道道在省城財殫事倍又遊民蕩子侮法敗風  
會流賊入寇河東薄太原甚急當是時城中官軍先  
已守備澤潞諸寮城守人當一門衡獨在南門南門  
者盜衝也乃移檄指揮賈彪設伏盤馱坂下賊由是  
懼走入冀南跨馬欲追擊之然無兵不果會官軍歸  
自澤潞受臺檄卽往追賊賊聞乃自壺關遁去巡按  
御史素不善劾以玩盜宜寘於理衡亦奏書訟冤然  
竟左遷漢陽至漢陽旬日疽發背卒

郭桂

郭桂字時芳咸寧縣人二十六舉鄉試三十三舉進

士爲知縣安丘安丘民王愷者富而橫令至啖之以  
利旣乃鉗制不得動令心內忿然無可奈何至是愷  
使人逆桂以利啖之拒不可怒斥之去至縣而愷自  
來謁乃發其事鞭笞之愷懼謀陰中以禍以罪擒殺  
之有訟其子盜金者且罵母桂知其後母也而謂翁  
曰亟歸發媪衣笥中可得金果得之于是翁大感悟  
知其媪爲之也乃復愛其子嘗趨郡謁郡大夫縣中  
囚乘隙反獄走匿不可得攝縣者懼追告之途曰當  
在其地古墳坎窞中果然其他政事明斷多類此遷  
湖州府通判督糧儲往未有能自拔超遷去者蓋多

以賄敗而桂獨以廉又綜理周密能祛其宿弊人莫敢犯之儲運輒先期完稱為能遷為泰州知州州有三虎曰鄧仁蘇容祁清桂至而鄧仁祁清以姦事發覺死蘇容獨存有以為言者曰姑待其自至一日姦事發覺至州門曰死矣曰死瘞州門下瘞之三日尸出屍乃死然其初實詐不死也其待惡戾民如此至于民則惟恐其或傷之于是州中遠近歌頌相戒不敢為惡恐犯教如三虎死居無何轉鎮江府同知始人見其理戎務也老吏猾胥斂手縮項弊端塞絕然不知其他嘗攝郡事理詞訟決疑獄而人乃更屈服翕然稱之惟恐不為郡守其後遷為開封郡守鎮江之人無不咨嗟嘆息惜其去欲挽留之不可得也至開封旬日會母喪以歸歸未久而父亦卒喪畢起復為平陽平陽山西大郡轄州縣多而是時海內多事盜賊起百姓凋弊又多藩邸下人桂至多方撫輯百姓安堵久之而衣食足歌頌興焉于是新堯廟增修舜禹廟煥然改觀戶部尚書韓公文洪洞人也年八十餘家居賓客非其人不與見也乃安車入平陽謁謝而曰老人無所求強為百姓一行未久擢叅政去以無病而卒得年五十九歲

王納誨

王納誨字獻可別號蒙谿其先幽人後徙長安爲長安人生有殊質父司教延津誨從侍肄學不擇昏旦凡諸經史子籍無不遍覽掇要不爲世俗學也學成歸試補弟子員弘治壬子中鄉試三試禮部不第乃遊國學友名流談古道博綜羣籍旁達世故一時無出其前者壬戌登進士宰相素知其人臨清河渠爲天下要衝而挽夫舟人叢集爲姦公私病之故授工部主事行部治閘事旣治閘乃爲立條章嚴約束時啓閉謹蓄泄閘事井井無不頌其便正德丙寅秩滿

獻績調吏部考功司主事戊辰晉員外郎己巳再晉驗封司郎中於是翻閱往牘悉復舊章自侯伯以下皆令庭叅而考課覈驗特嚴以公倖路塞絕請託抑沮諸以事至部者咸嚴憚之由是釁積於人庚午竟以時宰之故波及左謫易州同知在易奮勵自樹不以外內奪志時巨盜流劫畿輔間畿輔郡縣城郭多不完總制都御史幸庵彭公檄督修匝月以完報又令料理軍實軍實乃充壬申晉河南按察司僉事理屯河南寇亂之後屯多荒蕪乃爲反侵占給牛種時征斂減加耗杜侵漁三年屯政底績時郡有豪黠附

權武斷析人肢體官司坐視三年莫能執執豪伏法  
郡獄繫囚多至于數按牒剖決不三日獄幾空虛河  
南民凡有獄訟咸願赴之爲語曰神明神明云乙亥  
丁丑父母後先卒凡居憂五年巳卯復除河南僉事  
兵備信陽會革不果行改四川按察司僉事兵備敘  
瀘敘瀘邇夷務以懷遠固封宣威敷澤爲首務人人  
稱父母嘉靖壬午晉副使分司川西川北其巡兩川  
也風裁肅然貪墨解紱接踵去乃遇事直身當擔有  
不便民者悉罷除之雖拂巨室怒長官忤寮吏皆不  
之忌人或謂曰盍自圖笑不應事事如故其區處兩  
川事宜凡數百爲書凡十帙舉切時政無長冗言于  
是兩川爲改觀也復中簧言遠移雲南兵備臨安治  
臨安猶治敘瀘乙酉量移山西尋晉山西布政司右  
叅政由滇之晉道出故里遂卧病而卒性剛大不阿  
而心獨誠厚事父母極其歡心居喪盡禮其處宗黨  
恩禮次序秩秩如也志在天下毅然不遜有古人負  
荷之勇且魁岸獨峙不伍塵俗乃又好面折人人不  
合輒麾去不與語故庸人或少之而達士尊焉至其  
奮迅防禦之才堅固不渝之操洞朗旁達之識邃古  
玄秘之學固一時之鮮匹也

張璉

張璉耀州人不畏強禦巡按湖廣時有貴臣子橫於鄉守臣不敢問璉奏論如法武廟駐蹕大原有儀賓坐殺人繫獄者賂江彬丐免彬矯詔赦之璉曰天顏咫尺憲臣不親奉詔旨孰敢信儀賓竟不免人以是多之歷官戶部侍郎卒於官賜祭葬如例

王承裕

王承裕西安府人弘治癸丑進士選授兵科給事中歷吏科都給事中以言事觸逆瑾罰粟輸邊尋以父喪去位服闋除原官累陞戶部右侍郎提督倉場南京戶部尚書致仕卒承裕潔廉好學孝友端慎卓有父風士林重之

徐璉

徐璉字宗獻朝邑縣人弘治己未進士授戶部管倉監稅摠理遼東儲特所蒞有能聲出守袁州正德中宸濠構逆刃劫守臣稱兵趣留都以窺神器大中丞陽明王公首倡義師璉聞變謁王公於吉郡歸聚得兵五千人從下豫章破之濠攻皖城不下謀知豫章破即返旆遇兵黃家渡邢擊其左璉與戴出其右賊衆奔散濠就擒江土以寧方戰不食者二日不解甲



者四日獲賊級一千二十八名顆疏功與伍邢戴爲  
第一逾年僅晉左叅無何叙功議陞二級爲左使歸  
候缺又逾年而致政之命下矣退居善自韜晦絕口  
不言功日吟詠爲樂文典縟詩調高古不作濃艷語  
所著有玉峰集十五卷編群書纂要一百九十六卷  
享年七十有七

李紀

李紀字維之興平縣人弘治十一年舉人由祥符知  
縣選雲南道御史以劾劉瑾謫陳畱知縣八年陞寧  
海知州累陞山東僉事致仕

東郊

東郊字希宋華州人正德六年進士由平陽府推官  
選浙江道御史巡按蘇松以劾江彬降潞州判官後  
以原官致仕

郭田

郭田字汝耕長安人正德九年進士知嘉善性簡直  
政令畫一堅持冰蘖操人有饋遺輒峻拒每見解銀  
指謂左右曰此阿堵物能亡身敗家爾等毋爲所汙  
時有生員朱愚上書陳其過卽榜之縣門引以自罪  
後歷陞布政司叅議致仕今猶頌其廉明云



朱騁

朱騁字安國三原縣人進士由行人選浙江道御史  
巡倉丁憂復除本道建言廷杖降丹徒知縣陞南戶  
部主事累陞四川副使致仕

人物考卷之一百四目錄

陝西西安府二

馬理

嚴天祥

東野

韓邦靖

韓邦奇

呂柟

楊淳

李崇光

王元正

南大吉

東漢

張世緯

李宗樞

盧鳳紳

閻溥

康河

周吉

王縉

楊爵

呂應祥

王維楨

喬世寧

魏學曾

李世達

南逢吉

杜棠

張原

劉琦

張治道

胡侍

王懋

裴紹宗

許宗魯

杜鸞

周尚文

楊宏

補遺

郭文

劉昭

鄒應龍

孫丕揚

溫純

趙應元

馬自強

雒于仁

李伸

李

張

張

張

張

張

張

張

張

本朝京省人物考卷之一百四

陝西西安府二

馬理

馬理字伯循三原人學者稱為谿田先生初以春秋中弘治戊午鄉試再試禮闈未第游太學與呂涇野崔後渠諸公相切劘而文章德義名震都下高麗使人亦知慕之錄其文以歸乙丑喪生母庚午又喪父祥禫中會檢三禮編集成書安南貢使問禮部主事黃清曰關中馬理先生何尚未登仕籍其名重外夷若是至甲戌科復上春官公卿以下咸欲識面四方

學者至聚觀之乃以詩中式廷試二甲授稽勳主事  
改文選與郎中不合引疾告歸者三年戊寅復任值  
武廟將南巡理與黃鞏諸同志伏闕極諫雖受廷  
杖駕亦遂止未幾送母劉淑人還鄉乃設教于武  
安王祠藩臬諸君爲建嗟峨精舍以居生徒劉卒後  
尋起轉考功郎中丙戌例當考察外官時內閣冢宰  
各挾私忿欲去廣東河南陝西三省提學理乃昌言  
曰魏校蕭鳴鳳唐龍今有數人物若欲去此三人請  
先去理由是獲免其保全善類如此丁亥陞南通政  
赴任過河池見驛丞貌類黃鞏問之乃其弟肇叔開  
也泫然淚下厚禮之旣乃作詩贈之有六年復覩先  
生面爲過河池見叔開之句戊子引疾告歸辛卯陞  
光祿卿至則釐革宿弊裁省冗員癸巳疏病歸林下  
者十年癸卯復起南光祿而年七十一矣引例陳乞  
乃得賜歸卽隱於商山書院諸生問道者遠近踵集  
山中野服鶴髮童顏望而卽之飄然仙風道氣也如  
是者又十餘年而始告終每出不一二年卽歸歸必  
十數年而後起綽綽然于進退之間雖欲磨涅者亦  
末如之何也

嚴天祥

嚴天祥字叔善號雙洲朝邑人也生而靈異穎悟過人八歲能熟誦大學論語卽通其大義十二入縣學歲試兩魁諸生僉憲開州劉君珂有精鑒得其卷曰嚴生國士也於是遠近無不推嚴先生者庚子中陝西鄉試第六刻經義爲士程甲辰登進士授絳縣知縣期年而絳治人知向化野無盜賊案無停牘積獄幾空有兇犯毆傷人股致死者累檢無傷祥取二股骨察其形色長短新舊不同訊之兇犯具服蓋吏件受犯賄潛以他人枯骨易之寡母告子不孝祥廉得母與僧姦狀憐而釋之亦不治母曰子母之際難言

也撫按有疑獄輒以付之克明克允其治絳也不以刑罰爲威而以廉故豪猾畏不以賑費爲惠而以靖故民衆懷不以戒令爲期而以信故庶績熙而又敏達勤慎時環三晉而郡縣者七十餘絳縣治行第一戊申徵拜四川道監察御史未幾疾作彌留卒得年三十有六祥性孝友五六歲時每遇美果食必先奉母旣長朝夕惟以承歡父母爲念母病泣跪進食呼天而禱父落一齒持之泣累日嘗因事諫父父怒以履踏其面笑而受之父乃感悟絳平陽富邑祥三年間俸薪外分毫無取去絳時僚屬士民爭以饋進皆

不受曰取予士人之大節豈以去絳而遷其守乎其  
居身之珍治絳之美實兩無所歉云

東野

東野華州人三歲喪父五歲讀書學禮十五從師而  
受尚書二十舉於鄉明年舉進士又明年為陳留知  
縣陳留去藩服近民多健訟訟輒赴臺省不干縣吏  
縣吏顧無可奈何野至為聽其大者劇者而於細事  
以義退之無留滯焉於是皆仰戴之呼為神明而於  
大且劇者不復赴臺省惟赴愬於縣其一切細故輒  
相解釋無敢以煩瀆者河濫於縣北害于耕稼野乃

謀諸治河者築堤拒河河之舊汚於是為桑麻之地  
百里焉流亾之民皆復來歸賑貸之各有生業蓋戶  
口增以千計邏卒趙獻者有仇讐夜入刺獻死匿去  
弗可得眾以為弗得也乃竟得之縣故多盜於是盡  
散去為農無復敢為盜者陳州俠劉某者都指揮之  
子也嘗懷千金為俠俠嘗殺典史善賂自脫事故久  
不決事下野法當往閱死者因與期月某日當往乃  
謬謂有他不往矣蓋是時指揮已伏百人劫俠聞不  
往即散後竟往得窮其事殺俠於是河朔數百里之  
間又皆仰戴之呼為神明皆欲赴愬陳留向者學舍



諸生惟知有科舉書不復知有古文遺書諸史子集也於是購得之俾誦習焉而又設小學擇師傅教童子親爲校閱勤懇甚備也開封轄縣三十先是言破敝者必於陳留至是沃野綿亘耒耜相望風雨之會又適其時年穀屢登盜賊稀少歌誦之聲徧于鄉東西行過是縣者罔不改視易聽而撫按交章論薦問勞之使結轍於道正德丁卯秋吏部以御史起野引年不當爲御史乃爲刑部福建清吏司主事云其年冬視獄獄中夜三四起視獄未久疾作猶視獄獄中旣代出旬日乃遂不起年僅二十有六

韓邦靖

韓邦靖字汝慶朝邑縣人自稱曰五泉子母夢五色雲中奏咸韶之音已而玉女十餘持蓋擁一童子入室覺而生生而靈異三歲而能誦古詩百餘首四歲而能通孝經五歲而讀論語文王至德篇掩卷若有所思者父問之對曰卽如是武王非矣八歲而通舉子業十四而舉于鄉二十一而舉正德戊辰進士已巳拜工部主事奉部檄十庫監收庫宦官不爲禮邦靖自坐前席宦官怒給曰部尚書至因起撤坐邦靖詰之答曰公無與庫事者止一飯耳邦靖曰然則吾當

去矣答曰當署案邦靖曰豈有署案不與庫事者乎  
竟前席坐署案尋又兼收黑窰廠主廠者宦官厚燕  
接殷勤之歡邦靖不顧自起視秤分毫無所假宦官  
雖怒甚然無可奈何未幾抽分浙江先是抽分部使  
者往往避嫌乃重取於商爲羨餘以自白邦靖乃下  
令曰非巨木若竹木成器者不稅稅課舊領府幕官  
乃奏議寄布政司不與府幕官以部使者侵漁而府  
幕者易與耳又奏抽分司刑獄宜下按察司以防出  
入詔皆可故事抽分司覬鎮守太監歲千金是時鎮  
守劉太監者又谷大用之黨邦靖固不與金劉太監  
怒後知其爲人愈益敬之會宦者從京師來倚其近  
倖索抽分錢甚急劉太監從旁勸曰幸無求韓主事  
我當有以贈公也及代人奏乃課不足部尚書及工  
科給事中皆以法劾邦靖亦自劾求罷會國老有知  
其故者賴以無事壬申春南北畿內山東河南諸郡  
盜起天子命將征勦工部官例一人前除當前除  
者數人皆懼不敢往言之部尚書有泣下者次不及  
邦靖部尚書知邦靖素勇可使數目邦靖邦靖毅然  
請行後亦有天幸不害北歸遷負外郎奉部檄清查  
直隸山陝諸路歷年班匠銀兩旣見其民貧乃奏議



罷徵是時急於用財不許後以乾清宮災竟罷之以災異訪求直言邦靖上疏極言卽位以來朝政不修經筵罔御盤遊無節狎近羣儉挫折骨鯁之臣閉塞諫諍之路百度乖違庶事叢挫府庫空竭閭閻流散盜賊災異薦至迭興危亾之形已成社稷之憂將大疏上天子震怒下錦衣衛獄給事中李君鐸率衆論救之乃奪官爲民世宗卽位起爲山西左叅議分守大同革奸平獄權豪斂跡是時天子脩定策功封爵太濫而高山陽和諸衛軍士奉例開墾草場數千餘頃皆爲豪家占種前後上疏論列皆不報未

幾大同歲饑人相食又奏議請發內帑賑濟不許爲之憮然泣下輟食復抗疏論列累千餘言不報乃上疏乞歸都御史張公文錦奏留之而歸志已決復上疏報未下卽行西歸之日軍民遮留道上以萬計號泣不忍舍去至家稱觴壽母與諸兄弟燕會終日甚樂也乃未幾病卒年三十有六

韓邦奇

韓邦奇字汝節陝西朝邑人正德戊辰進士仕至南京兵部尚書卒贈太子少保謚恭簡性剛直尚節槩初舉進士值劉瑾亂政朝士奪氣同年多往謁之邦

奇卒不往爲時所重爲浙江按察僉事分巡杭嚴獨  
持風裁凡鎮守并織造中官有所求爲率裁抑之積  
忤旣久後因富陽縣產茶與鮐魚進貢採取時民不  
勝其勞擾目擊其患作歌曰富陽山之茶富陽江之  
魚茶香破我家魚肥賣我兒採茶婦捕魚夫官府拷  
掠無完膚皇天本至仁此地何辜魚兮不出別縣茶  
兮不出別都富陽山何日頽富陽江何日枯山頽茶  
亦死江枯魚亦無山不頽江不枯吾民何以甦後被  
鎮守奏以作歌怨謫阻絕進貢逮至京下錦衣獄褫  
其官初被逮時杭府縣贈錦衣官校金祈途中寬梃  
斥之曰死則死耳何以金爲及府縣贈以路費揮之  
挺挺不屈真烈丈夫也已得釋陞山西叅議分守冀  
北弟邦靖嘗以是官威行惠懷甚得士民心旣下車  
鴈門士民父老園告曰先使君之治誠善願使君守  
而勿失感慕咨嗟有泣下者後所行一無改于舊民  
甚安之擢都御史巡撫山西政益嚴肅守益儉朴間  
日以廩米易肉一斤有司供餽悉拒不受廳事惟二  
小青衣侍立三司官入揖議事數語而決公庭如水  
不聞履聲諸王府總兵武衛官俱相戒不敢犯陞左  
右侍郎久之陞南京兵部尚書廉簡鎮靜寡交接雖

周性

周性

六卿同列亦罕往返每拜表 聖誕令節赴禮部禮  
 畢孑然獨行內外守備議事外一不他及威望聳然  
 性好學老不釋卷尤精於律數所著有律呂直解并  
 樂書數十卷性極孝友與弟邦靖同舉進士交相砥  
 礪事父蓮峰先生及閻恭人終身不違顏色愛靖切  
 至疾于廬幾一載汗惡之氣人咸不堪靖侍側未嘗  
 少離飲食必親奉湯藥必分飲鄉士夫立孝弟碑為  
 鄉閭式後靖病亟日慟泣不解衣不滋味者三月餘  
 形且瘁靖譬曉之泣曰吾弟憶東坡詩乎來生之因  
 尚當同兄弟也及靖卒屢廢寢食哭絕衰經蔬食祥  
 而弗懈嘗謂其友樊恕夫曰世安有司馬遷關漢卿  
 之筆能寫吾思弟痛弟之情吾當以此身報之故樊  
 恕夫碑曰自有兄弟以來中間道德之高功業相映  
 亦多矣至相愛之深相信之篤所見之同如公兄弟  
 可謂曠世少有矣

呂 柟

呂柟字仲木號涇野高陵人生而穎敏特異未總冊  
 輒有志聖賢之道夏居矮屋衣冠危坐雖炎暑燂金  
 不越戶限至冬月祁寒則履藉麥草誦恒達曙年十  
 四應試臨潼貧不能假館宿新豐空舍夜夢老人自

驪山而下謂曰爾力學後當魁天下既試補廩膳生  
母宋卒哀毀骨立所居寺中一日聞父疾走還叅政  
熊公命驛馬追送弗受父疾尋愈乃居雲槐精舍多  
士景從更歷五禩踐履篤實粹益外著戊辰廷試遂  
擢第一人漠然不動若固有之在官二年安西亂疏  
請上出宮御經筵親政事時中官惡其言欲嗾殺  
之乞養病得歸抵家數月而中官伏誅居家杜門謝  
客糲食草茹若將終身以薦起用入朝上勸學疏略

上嘉納時乾清宮災應詔陳言一曰逐日臨朝聽  
政二曰還處宮寢預圖儲貳三曰郊社禘嘗祗肅欽  
承四曰日朝兩宮承顏順志五曰遣去義子番僧邊  
軍令各寧業六曰各處鎮守中官貪婪取回別用又  
累進講勸上舉直錯枉疏後引疾乞歸時西安秋旱  
禾槁有司槩征租言於當道獲薄征張仲修爲御史  
築河東書院成請定三晉應祀名賢既論定其祀又  
答以書謂今定祀惟取大義不論文辭俾學者知所  
趨向父渭陽公病侍湯藥晝夜衣不解帶履恒無聲  
如是一年鬚鬢變白丙子父卒哀毀咯血時陝西鎮  
守中官廖氏餽以金幣諸物卻之有客托交遊以三  
百金求書曰人心如青天白日不意視如鳥獸也其

人慚而退 世宗登極起復館職纂脩 武廟實錄  
進講虞書適值 仁祖淳皇后忌辰耕口奏存祿服  
之禮罷酒飯之賜癸未克會試同考試官所取士二  
十餘人皆名士嘗上疏請溫尋聖學曰學貴知要而  
力行故慎獨克已上對天心親賢遠讒下通民志甲  
申奉旨修省以十有三事自劾疏上出山西解州判  
官至解首恤無告及諸貧困以木綿米肉給之見解  
之丁差倍徙他邑乃懇告當路會議分派槩省而解  
民始獲蘇復卽廢寺建解梁書院選民間俊秀子弟  
俾習小學之節歌豳風之詩又令諸耆德俊民朔望  
講讀會典諸禮及行藍田呂氏鄉約凡冠婚喪祭俾  
皆尊聞行知察諸孝子義士節婦咸尊奉詔旨題表  
其門復求子夏之後令其入學建溫公之祀而考序  
其集築隄以護鹽池疏渠以興水利桑麻以導蠶績  
於是士民率由風俗丕變屬縣亦觀感而化陞南京  
吏部考功司郎中四方從學士及州人皆冒雨送至  
河干旣去解人思之不忘豎碑以識遺愛至留都日  
親吏牘忘其煩勞陞南京尚寶司卿乃復授學鷲峰  
禪寺東南之士及門者益衆壬辰冬陞南京太常寺  
少卿迎繼母侯就養又禁道士俗教每月令演樂者

再南京太廟災例上疏自陳乞罷黜不許時閣大臣再斥再起九卿皆遣人候之塗有約與俱往者曰生平無一面識不敢輒通刺禮也乙未陞國子監祭酒首發明監規教人以正心爲本忠孝爲先取儀禮及爲詩樂圖譜俾諸生講肄諸生皆以德行道義相先而禮樂并行聲容俱美諸公侯子弟皆率教樂學諸觀政進士及歷事舉人數就而問業中官沈東亦時至聽講陞南京禮部右侍郎九卿謁孝陵着祿淡衣同僚曰盍着緋公曰上陵望墓生哀服祿爲是衆從之有蔡生請鹽商墓志不獲同僚爲之請曰生與相有舊可勿拒曰一書生而遨遊權貴之門得志則下陵可知終拒之署南京吏部印疏薦時賢備任用又薦將材數人尋進表朝賀畢見閣大臣閣臣曰某匪人曰愚與居未知其非祇見其才耳公合天下之才以事聖主可也閣臣不悅返留都累疏乞停止親視山陵及慎重大禮上悉納五月復進聖節表道過河南見餓殍盈途語所在郡縣堊之抵京值奉先殿災例自陳上允其致仕歸事繼母侯孝養備至侯病頭風畏寒親爲艾褥進乃安侯卒哀毀殯殮如禮壬寅七月卒享年六十四卒之日食時復有

大星流光震隕之變遠邇弔者以千計大夫士及門人悲痛如私親巷哭爲罷市三日解梁及四方弟子聞計皆爲位哭著述甚富學士家咸珍襲之

楊淳

楊淳字重夫號繡嶺臨潼人垂髫時恬靜寡言雅有志向酷嗜詩書既登進士後觀政兵部授江西道御史時宦官劉瑾索求科道瑕疵適決大辟衆皆推避無肯行者淳毅然請行大中丞屠公喜其勇敢能任事也而瑾惡其同鄉不附已諷當道改淳工部主事庚午安化王叛王師于征爲之先事前行辛未被差

荆州抽分竹木時川中多盜商販十減四五兼以勢要請託齟齬旁午一切遏抑不行遷本部營繕司員外郎管臺基等廠尋差遼東查盤軍器甲戌陞都水司郎中管理通州南班河道浚決潢汚築復隄防一時糧道稱便京儲頓增時中官方橫舳艫往來陵輓州司需索無算聞淳咸退避無敢恣者時中貴使西域取佛船百艘所費萬計聲勢赫熾沿河州司懼不敢支淳移檄擒治其黨衆斂迹而去國初工部尚書宋公禮治河有大功爲修葺其祠宇復纂王端毅公之奏議丘文莊公之詩刊爲漕河紀事以永宋公之

功又嘗發庫帑羨金以修孔廟其地舊有徐君墓乃延陵子挂劍處也亦築祠立碑以表其賢三載再補虞衡郎中未一年陞湖廣寶慶知府南楚風浮俗又尚鬼乃首興學校延經師以開勸生徒四擒妖巫徧毀淫祠始則詞訟盈庭一判數千期月之間浮風丕變案牘立清民有妻外適而娶妾者其妻生子尋其父不認赴愬于淳淳注水于盆破其鼻流血于盆中并取他隸血于盆以辯同異其民遂抱子而泣歸處其妻如初又嘗奏革岷藩過用桐油船料數萬強占居民田產數千并擒治其撥置之人及陞山西副使奉勅管理鴈門等關兵備便道歸家適丁父憂服除改湖廣郴桂兵備郴桂楚之南徼也地雜苗夷俗多寇盜有禪光眼者聚眾數千肆行劫奪皆捕平之行蒙賞賚嘉靖辛卯陞四川叅政次年陞本省按察使次年陞本省右轄尋陞左在蜀日威茂諸邊將常因番夷入寇多殺無辜以邀賞賚累檄諭以禍福勸戒切至諸將感悟在臬司蜀藩贈兼金一百撫臺贈金八十皆不受貯之庫其爲叅政時嘗視篆當放支銀五萬或曰此可得羨餘終不肯放支平生以清忠自勵慕趙清獻之爲人俸祿之外一毫無私子弟



有諷其置產業者乃厲聲訶之曰汝第勤耕力學我不爲汝所役使也見着綺羅者則曰此可易用乎甲午冬聞太宜人訃毀悼幾不生卽日奔歸自是遺榮養素居室蕭然己亥五月十六日有雷震聲異常卽攝衣起危坐若有待者人弗喻其意頃之見星隕于居之西北隅次日延賓談笑間微覺不快遽不起矣

### 李崇光

李崇光字宗顯陝西高陵人少爲邑學生貢入太學正德庚午授南京國子監典籍事父母能色養得其歡心父疾親嘗湯藥侍臥其側晝夜不解帶旣殯猶寢苦顏色枯槁其事母疾猶事父也嘗作塋域築堵環之種樹百章羅列成行又嘗代諸兄構屋及爲典籍又以其俸貲作服具畀諸兄國朝典籍書板多在南監縉紳置籍者印千紙例輸白銀伍分於典籍以爲常崇光辭勿受祭酒司業咸嘉之以疾卒於官

### 王元正

王元正字舜卿盩厔人正德辛未進士改翰林院庶吉士授檢討武宗幸宣大述五子之歌以諷後以議大禮謫戍茂州卒隆慶初贈翰林修撰

### 南大吉

本朝分省人物考

卷一百四

十五

陝西二

南大吉字元善渭南人正德辛未進士歷官戶部主事員外郎郎中紹興府知府守紹興時政修廢舉肇造晦翁稽山書院萃屬邑髦士教之成者什九科目由此更盛有學士侵王右軍謝太傅故地悉割歸其主由是罷歸紹興士民垂涕如失父母歸構酒水書院以教四方來學之士出其門者多位至方岳文行名世弟逢吉姪軒皆其所教成立者著有瑞泉集紹興志渭南志諸書

東漢

東漢字希節別號渭川華州人生之夕母夢樂聲洋洋自空中下導一綠衣婦盤捧嬰兒降于寢所而漢生天性孝友靈穎非常年十一父任按察卒于官扶柩悲號自蜀及家間關數千里不替比長窮覽墳典刻厲有志嘗夜不就榻晝自炊食惡衣蔬飭意澹性恬若不自知爲貴公子者爲學官弟子遂有名戊午中鄉試高等五試南宮不第正德辛未始就選吏部授池州府同知語人曰吾母老矣竢必第能養吾懼薤露之先晞也至池州會造黃冊立法祛弊招亾附籍戶口增于往昔者二萬有奇劇賊劉七起攻陷劫掠流掠江湖吳楚間勢甚熾莫之敢禦乃點選民兵

得壯丁數千人陣于永豐鎮鬪壠口山等處晝操夜  
守斷絕賊路賊以是不犯又石埭章仁者起兵謀叛  
患且不測計殲渠魁餘黨悉散又胡天龍者連結王  
浩聚衆行劫衝突無前乃分兵于大洪嶺莊嶺赤嶺  
羊棧嶺並通黟祁等處凡數十戰賊敗衄遁三月遂  
平有程文寶者劫殺人而匿胡三隆所捕者至文寶  
買捕者顧誣指三隆爲劫縛于官文寶獲賞漢察三  
隆有寃色鞫之文寶吐實三隆得釋人服其神甲戌  
改鎮江府同知治鎮江一如治池大抵察民隱剔政  
蠹戢豪右斥姦宄故所至咸仰戴云丙子陞南京戶

李禹

部員外郎庚辰陞本部郎中寧藩之變部議齎金募  
兵諸當行者輒辭不往漢獨請行已又返其羨金大  
司馬喬公聞之歎曰毅哉東員外不可能也旣爲郎  
中奉檄清查江西錢糧得五百萬石宿弊一洗勞費  
心神遂以疾乞歸而侍養于家嘉靖甲申陞江西九  
江知府九江三年修葺文廟辨海賊之誣毀淫祠以  
正俗殄渠寇以靖難丁亥改南昌南昌視九江倍劇  
優優理之一如無事時有鎮守黎太監者怙勢張威  
誅索無忌獨不能干知府見之傲不爲禮遂拂衣出  
會錦衣使者至意有所干黎璫聞之曰固且止東太

守剛直不可犯也歲大饑出粟賑之他郡悉來就食  
不爲禁曰均吾民奈何分彼此邪活者數萬遷九江  
兵備副使會當塗弗悅不報戊子陞長蘆鹽運司運  
使一年釐弊通商人人戴之爲勒石頌德庚寅上疏  
乞致仕侍親上許之歸一年而太恭人卒哀哭骨  
立臥土草于柩側大冬嚴雪未嘗之避

張緯

張緯字文之咸陽人也自稱曰渭涯子少從學許時  
勉舉子業時勉大奇之呼爲小友父歿一哭幾死自  
是愈益勵學補學官弟子試輒高等弘治辛酉中鄉  
試累舉進士不第其兄勸之仕不肯乃就城北僧舍  
誦習甚苦閱二十年而正德辛巳舉進士第明年嘉  
靖壬午擢拜江西道監察御史是時天子新卽位  
有以佛老進者緯乃抗疏上諫謂新政之始不宜自  
入于邪導人以非僻之學目左右儉人朝夕窺伺此  
隙一開其勢漸盛履霜堅冰不可不慎其微疏留中  
不報江南民鄧愈唐者逆彬用事時爲仇家誣執繫  
獄數年不決無辜死者若干人緯立剖得其情在廷  
諸老多譽之者甲申巡視居庸諸關峻崖絕澗靡不  
經涉所至練武脩備發奸摘伏邊人頌焉大同有變

周性  
緯建議以爲恩浮于威無以示戒宜有震動以彰天  
討事下兵部集議多見采納比代有所舉劾鮮不核  
實乙酉奉命巡按遼東前此已抱病而是時遼東多  
事衆方冀其大有爲緯亦自奮欲往會病不果竟以  
是年卒于京師舍中貧不能具棺殮其友谿田馬伯  
循武功楊用甫率其嘗與游者棺殮歸其喪

李宗樞

李宗樞字子西富平人嘉靖癸未進士授諸城知縣  
徵拜監察御史劾都御史汪鋹不法狀出爲河南僉  
事累遷巡撫右僉都御史以疾卒宗樞有經濟才不  
竟所施論者惜之

盧紳

盧紳字汝佩書庵別號也咸寧人少而穎敏潛心問  
學博覽典墳爲邑弟子負選入正學書院纂修雍大  
記諸書多所撰述壬午舉於鄉明年舉進士授四川  
遂寧縣令廉勤自勵治教大行邑人戴之宛若慈母  
邑瀕大河曩有洚水之患築以魏堤植以密柳水害  
永消民受其利會蜀連年青災飛蝗滿野獨不入縣  
境衆咸咤歎焉六載之間折獄明允無橫羅刑辟者  
庶幾畫像之風歲旱大雩素衣徒步禱於羣祠輒有

甘澍之霈人胥頌之戊子入拜工部主事治水呂梁  
有功癸巳往督杭州竹木廠立法寬平商民感德進  
貢外郎督造臨清等處輓料兼理衛河提舉時人大  
工孔亟磚用數倍常額經理維勤蠲省費百工若商  
便之運不稽留事有攸濟人上嘉悅洊錫銀幣有差  
進郎中管理九廟平慈寧兩宮勞績懋著九廟工  
成加俸一級為兩宮工成陞二級辛丑擢湖廣按察  
司副使撫治荆南加意救寧鎮靜不擾豪猾巨奸廉  
致於法一道肅然撫屬界連川貴諸夷搆兵連歲不  
解天子怒下守臣委紳會兩省勘議紳首宣言於

衆曰夷性犬羊先王以不治治之若繩制太嚴恐生  
他虞不若開諭利害俾罷兵息民足矣衆從之諸夷  
帖服癸卯總理工務有白金綵幣之錫甲辰擢江西  
布政司叅政分守湖東瑞州寇起單車往諭解散其  
黨歲侵民饑賑恤有條全活者衆丁未擢貴州按察  
使清平衛指揮某者暴虐貪婪激變軍士連結諸苗  
爲亂驅車入城執首惡以泄羣怒申國典以示更生  
梗化之徒感泣紀綱肅然戊申擢山西右布政使庚  
戌改山東左布政使宗藩歲祿之供邊關兵馬之  
餉諸務旁午紳調停區畫咸麗厥宜辛亥進擢順天

府尹時有勲貴人權傾中外倚勢欲奪畿內民田數百頃者關說京兆紳力拒不顧人以為難壬子擢戶部右侍郎甲寅改左總督倉場兼理西苑農事申明舊章釐革宿蠹清查積貯附餘米十餘萬石以裕國儲然持法過嚴同事有銜之者矣三載考績錄一子洪先為太學生居太倉三年游蒙銀幣鈔錠羊酒之賜丙辰起拜南京戶部尚書定立章程約束悉鑿鑿可行丁巳循例自陳致仕上賜允歸鑿池畜魚栽花藝竹興至則與二三知友飲酒彈碁論文話舊日以自適紳儉樸冲澹為人誠恪簡夷於世味泊然絕無所好雖囊無餘資廩無餘粟而散財喜施不責償報嘗謂人寧負我毋我負人寧我容人毋人容我立朝正色直諒侃侃不阿一時交口誦之而沮之者亦力家居孝弟肫肫事父竹軒公先意承志罔有所違伯仲二兄蚤世撫其遺孤授以恒業教之誨之不啻已子關中人士稱之謂為不可及云

閻溥

閻溥字克周興平人也弱冠受知於學使虎谷王先生正德丁卯中鄉試嘉靖癸未登進士授刑部主事已丑晉員外郎郎中辛卯陞直隸保定府知府甲午

陞浙江按察司副使明年乙未被論罷歸溥初舉於鄉年才二十又四後屢困南宮復值家替方其居太學時闈人劉瑾竊政溥爲同邑人或勸爲速化計厲色揮謝退益淬礪講學授徒處貧而樂後卒取上第其在比部研精律例鞫訊不苟原情附律不苟不縱人稱平焉是時光祿崔卿子忿殺鄰婦其子故宰相甥也時宰曲爲請釋謝不往見迫之見復謝曰僕與相公均有法守光祿子罪抵死相公欲生之宰相易法亂道也僕守死不敢易嗣有富室袁氏姻聯鉅璫事下法曹朝貴半爲請託且賂以鉅萬竟置於法朝

論翕然歸之謂爲真法吏其守保定郡爲右輔路當八衝兵衛雜糅錢穀獄訟應接不暇盜賊鋒起豪右戚畹武斷漁獵凡人有不堪者處之裕如若其抵徐某之罪而攘奪之害革發魏東之姦而府庾之弊釐塞唐水之泛而沮沒之患熄程邊運之役而轉輸之勞均嚴課試之方而科第之才盛獎廉勤之吏而郡邑之政修慎鄉飲之選而禮讓之風醇表節孝之門而習俗之頽振古稱循良不翅過之癸巳秋大同搆變朝命宗伯黃公戡撫黃請於上遴溥與俱溥乃揚威布澤持法行權元惡就刑反側向化豎績爲多旣



乃晉副浙臺適臺負闕乃兼攝數事浙人素欽其譽  
吏慄慄不自存民則熙熙自慰也先時臺中申飭憲  
度率由舊章謂郡牧臺史先時接見有制凡庭叅止  
長揖不屈膝今靡靡不自振矣今宜復故一時列郡  
觀望可否溥曰是何疑哉臺史郡牧均人臣也憲度  
具在余惟執禮以遇越分媚人吾恥爲之徑揖不顧  
臺史陽加獎善陰排於同列羣議煽沸鬱而未揚乃  
闕其去郡攜撫絲髮交鬩擊攻乃擲不校浩然賦歸  
一切仕進棄不置念讀書教子彈碁賦詩飲酒自放  
漠然於世不相關也卒之日鄉評士論皆惜其閔擴  
之才而尚其長厚之風云

康河

康河字德清武功人少質秀發長嗣家學與其從兄  
修撰海兄負外浩皆以科第後先興起治詩能得詩  
人旨奧發爲詞章婉麗溫厚正則平達觀聽者感懲  
革化風被爲多論者謂其得詩教焉故以之飾吏則  
司儲司稅以及典郡培本抑末通商裕賦植善布惠  
才賢之稱播於郎署著於郡國顯奕宏肆駕出流等  
古云不器居之無忝焉然性爽介與人不瓦合方其  
居業與同業者平第文翰銓秩人物時出其見以拆

人務奪其氣乃已比其入官乃益殫才効職不畏難不辭勞不避嫌不規利故由之馳聲亦以之賈怨然其心則自負無悔也至其解仕而歸脫棄塵俗放情丘壑期反天真一切世務蠲屏無遺奄然歸盡略無嬰繫按河中嘉靖壬午鄉試癸未進士歷官戶部主事晉員外郎再晉郎中出守兗州移守廣西內徙贛州病歸而卒年止五十有五

周吉

周吉字應貞號一川西安左衛人舉嘉靖乙酉鄉試再應進士舉不第壬辰就中牟學諭學諭累八年始遷沁水令甫一年調蘭陽蘭陽又一年卽罷歸性剛鯁負奇氣與人無戲狎平生守經自信力斥陰陽釋老師巫與諸外家者言始受易副使君副使君大奇之于是以明經著聲士率來受經門下遇門下士特嚴重門下士卽年長宦成者猶敬憚如童子時其教中牟士愈益嚴皆憚而遠之久乃知其方正長者乃更益服習敬焉督學吳仕聘長大梁書院庚子聘江西考試官故事考試官率伏聽御史不得自取士獨以掌故與御史力爭不屈御史亦折節從之是年冬遷沁水會虜警有令多募民兵力請裁其半歲旱虔

禱輒得雨又賑濟善民不重困以死顧數以事忤上官上官數不善踰年遂調蘭陽是時儀封郭儒毆妻死獄久不成陳州孔某以負債久繫一訊咸抵罪立決貴勢者數為言已又行賄盡置不理人大稱快焉尚書周用知其能檄令修河未幾河即就功會御史與縣丞有故以丞有間言于御史御史乃面折之吉亦執對種種有狀人以是目為周戆然自以峭直不容數乞休歸作得失吟以見志因自號宜休子居官過清苦或勸稍為子孫計輒大笑不應歸有東郭下田百畝即為園日讀書其中著讀易初筮一川野稿已又自作像贊自經紀其終事其達生若此先是中牟訓導何漢清者卒于官無子厚賻歸其喪新鄭令洪勲以百金託遺中貴侍膳者無何勲逮詔獄撫其妻子還之金人尤服其高義云

王 縉

王縉字朝儀其先廬陵著姓高祖用曾祖頻竝西安後衛百戶祖璧考鎮竝副千戶遂世襲關中鎮忠勇邁倫致命朔堊縉以曼倩學劍之年承勾踐納官之典爛其熊繡突而鷹揚嘉靖六年歲在丁亥馘虜白羊嶺稍遷正千戶戊子鑿青沙峴庚寅破箬籠嶺竝

捷進指揮僉事甲午戰清水河丁酉援柳樹營積功  
遷固原守備旋進都指揮僉事克右叅將分守延綏  
巳亥伏涼水灣庚子攻孟家塔破高松砦捩神木山  
殊庸疊懋擢副總兵協守延綏辛丑承本兵檄批山  
西虜掣風爍電不陣而馳東絕大河逆虜授首摧堅  
擊瑕斬鹵越等獻捷音於在泮錫金繒於轅門壬寅  
再戰介休功與前埒唱凱言旋假握帥印扞威武堡  
搏定邊營虜愴威稜喙息而駭便蕃再賁闔外益光  
癸卯進右軍都督府署都督僉事鎮守陝西地方露  
布屢聞太常載紀於是實授都督僉事丁未拜征西  
將軍總兵官鎮守寧夏方冀永典巨鎮鬱爲長城而  
以義渠之劔坐剔虎鈕角巾私第不怨不尤時宜嘉  
賓優游宴喜歲庚戌疾卒享年五十有九縉雅操寬  
中識局朗澹衽金浴鐵逾四十年北禦狼裔西拒犬  
戎大戰十數小戰數十獲虜之馘至于二百牛馬器  
甲益無算焉進律登壇計功而得匪冒濫也一值僨  
躓遂從吏議爲法受惡口絕辯言豈不悃悃君子哉

楊爵

楊爵富平人也以進士爲侍御史抗直不阿嘉靖中  
上疏請慰人心以隆治道曰天下之患莫大于以危

爲安以災爲利以可憂爲太平法家拂士日遠而快  
意肆情之事無敢齟齬于其間此積弊而蠱所以爲  
不可救藥之病也往年夏秋恒暘不雨畿輔千里無  
禾歷冬無雪暖氣如春元旦僅雪卽止民失所望洵  
洵無聊此正 陛下撤樂減膳率羣下祈惠祐之時  
也而大學士夏言數人者方以爲靈瑞而稱頌之不  
幾于安危利災以大可憂者爲樂耶大臣之職當輔  
君當道志仁先天下以爲憂無忠亮體國之心而居  
人臣之極位是所謂小人乘君子之器者也翊國公  
郭勛中外皆知其爲天下之惡 朝廷之蠹也迹其

舉動亦豈能有逃于 聖鑒哉顧 聖德優容不忍  
卽罪神謀遠慮自有所處臣愚以爲奸不可近惡不  
可長若止之于微遏之于漸則 朝廷優禮大臣體  
貌未失而武勳餘裔亦得以善其終或使稔惡肆毒  
潛干政柄羣邪趨附善類退處于天下國家之禍必  
深矣治道去其太甚此其失人心而致危亂者一也  
臣近巡南城兩月中凍餒死者八十一人此南城一  
郭耳其諸五城尚未知有幾也千里之遠耳目之所  
不及又不知其有幾也此皆 陛下之赤子望豆蔬  
延須臾之生而不得正 陛下憂民惜財與天下休

息之時也而土木之功累年未止工部屬官添設至數十員又以一方士之故差官萬里遠修雷壇浚民膏血而不知卹窮民之財盡民之力其無乃自蹙其根本也乎今北虜跳梁內寇竊發加以頻年災異上下一空百計取之愈爲不足而興作未已以結怨于天下此其足以失人心而致危亂者二也 陛下卽位之初勵精有爲不遑寧處嘗以敬一箴頒天下于堯舜三王之道蓋心得而服行之矣數年以來朝儀間闕經筵輟講大小臣庶朝參辭謝未嘗得一覩

聖容敷奏未嘗得一聆 天語今庶官入覲遠自萬里孰不欲一望 天顏以慰快覩之心而咫尺闕庭不得一見臣恐人心日益怠惰中外日益抗敝非隆古君臣同寅協恭以臻太平之氣象也此其足以失人心而致危亂者三也聖王之世執左道以惑人者必誅而保傅之職坐而論道古所謂官不必備惟其人者也今舉名器之重而昇諸迂恠之徒異言異服列于廷苑金章赤綬延及方外而名器之濫極于此矣 陛下以天縱 聖資爲上天元后遠宗帝王之道近守 祖宗之法細旃廣厦與公卿賢士講論治道則心正身修與天地合德日月合明和氣致祥罔

梁仲德

有天災山川鬼神莫不擁護安用假此妖誕邪妄之術列諸法禁而藉之為 聖躬之福耶甚非天子所以崇正遠邪平平蕩蕩奉三無私以化天下之道也臣恐風聲所及人趨異教貽四方之笑取百世之譏于 聖德國政所損不細此其足以失人心而致禍亂者四也 陛下臨御之初延訪忠諒虛懷納諫狂直敢言之士往往矜宥故一時臣工恃 陛下能容敢以直言干冒 天聽言過激切而不獲罪者亦多有之比年以來震之以 天威加之以危禍如往年太僕寺卿楊最言 身立死近日左贊善羅洪先

等皆以言為罪而加之屏斥自今以後雖懷忠義之心非灰心仕進甘退丘園亦必深自晦藏為保身之計孰敢發口論天下之事以取死亾哉忠蓋杜口則諂諛交進上德不達下情不通堂陛之近遠于萬里此其足以失人心而致禍亂者五也疏上下詔獄械繫者數年雖處憂抑中端凝正直即獄卒咸敬信之久之得釋而會尚書浹有陳論 上大恚曰我固知釋爵諸妄言歸過者立至矣命即與給事中周怡郎中劉魁俱就逮爵時抵家方一日忽錦衣校至曰若復來乎校素敬爵慰之曰吾欲有他往特一省公爵

陝西二

笑曰吾知之與校同飯飯糲食校不能堪爵啗茹自  
若也食已曰行乎校曰宜一入爲別爵立屏前曰  
朝廷有旨見逮吾行矣卽攬袂行復再踰年乃出

呂應祥

呂應祥字子和號涇陽西安人少警敏絕人日記數  
百千言督學凌谿朱公補爲諸生愛其文奇之稍長  
學日益博談諸儒理性上下古今疊疊不竭同學生  
每聚論環坐傾聽罔不嘉歎以去皆自以爲不及也  
正德己卯魁省試登嘉靖壬辰進士授行人選吏科  
給事中旣爲給事以敢諫直言自任無顧忌心曰朝

廷以言官爲耳目也苟顧忌卽蔽明塞聰忍緘默不  
爲朝廷所乎會京師地震卽偕同科者上書言汰冗  
賑貧倡勇恤讞節賞五事已奉命監二十四草場疏  
發司場太監通商減芻奸狀已又諫止入道士度牒  
金佐內工已奉命同黃御史覆宣大邊饟參伍稽察  
盡得其登耗出入之實劾都御史以下若干人人服  
其風力已又條塞下便宜十事上之擇將帥重總督  
恤將士精器械修城堡嚴烽燧增年例明戰守慎賞  
罰振紀綱累數千言皆切事實可施行上嘉納焉

上幸承天祔 皇太后顯陵應祥以禮科都給事



中從議禮多所匡言還詔賜特優是年內閣與吏部  
議選官僚多賂進者於是憤然抗疏略曰臣聞太子  
國儲副師友必於天下英俊自三王暨我列聖未有  
不慎其選者也頃陛下詔旨謂不必備負正欲惟  
其人耳而選者率以賂聞此豈聖世所宜有安望其  
成令德也陛下不聞里人之愛其子者乎當出就  
外傳必慎擇所以爲傅者太子天下本而輔導之官  
顧可不擇令若是濫哉臣見臺省負闕必會官推舉  
舉多當名實官僚關係不在臺省下獨奈何不會推  
臣願罷諸賂進者用會推例推一時英俊以聞疏上  
觸執事者怒奪官爲民越五年會恩詔復其冠帶致  
仕自罷歸日奉母媿孝養備至媿性嚴善怒應祥在  
側則常權平居不設城府常葛巾徒步里巷中接人  
雖貧賤均禮與故舊更款洽多所周急未第時有狂  
悖隣人加之以橫逆後其人悔懼數獻恭直與之渾  
相忘如未嘗卻也初立家廟補四代主歲時率子弟  
奉祭畢燕坐訓之家政當道薦起用者以十數應祥  
聞之特扁其堂曰知止積圖書其中日披玩四方從  
學者甚衆皆相繼成名去當道以渭南地震甚約暫  
借涇陽郵館顧久不還涇民苦之應祥率諸大夫數

言上官卒還之洪堰水利寢弊寢微乃親爲指授方略著書示久遠此皆非已事而挺然樂爲之雖他亦皆類此使久於位其濟世及物功澤詎可量哉卒年七十二

王維楨

王維楨字允寧陝西華州人舉嘉靖乙未進士改翰林庶吉士授編脩歷官至南京國子祭酒便道過家會關中大震殞于家維楨性亢急於世少所推讓獨與餘姚孫陞游陞與維楨同舉進士爲史官日聚著作退朝輒相與就舍持文墨議論終夜不輟以爲常有故則走豎子挾策進之務相攻錯瑕瑜不掩以是二人甚油油然久相好也維楨爲文法司馬子長詩法漢魏近體法盛唐尤宗杜氏居常好深沉之思務引于繩墨必結構中度而後修辭否則歷月經歲筆不直下也維楨歿陞官禮部尚書爲之哀次得詩文若干卷曰存笥稿刊于關中再刻于蘇州陞叙之曰余觀作者之林其長短較異卽能屬書摘辭而聲詩不振抑或以近體取重古體絀焉尺有所短寸有所長非虛語也獨崆峒先生得其具體王子與之後先入室皆得擅場卽關中多才賢此兩人者豈易得哉

王子既博學強識與之抵掌論事四方疾苦九邊要  
害又可坐而策之曾不得終其天年功用未起命也  
所著有王氏存笥稿又有續稿並行於世

喬世寧

喬世寧字景叔耀州人也生有異稟日記數千言又  
強學不倦雖至老未嘗一日不學古詩法漢魏近體  
法唐文法秦漢融貫於古自勦桀黷一時作者斂紳  
歎服咸稱不及遂卓然為名家今所傳丘隅集是手  
自芟裁者也初為諸生督學使秦公文何公景明唐  
公龍皆目為國士嘉靖乙酉舉于鄉果第一戊戌進

士授南京戶部主事凡再擢至郎中掾紳學士莫不  
交好各枕經籍書求通其願未幾擢四川僉事分按  
川南地川南控引越雋牂牁諸戎號難治盡取故牘  
察事所緩急重輕卽連引數十年悉酌以法理決遣  
罷之時時巡行郡縣獎吏民之良與罰其怙惡者素  
彊執不阿比執政者欲叙其文因蜀之寮案致言於  
世寧置之不為理有蒲人告嘉州人不償貸州答之  
死讎蒲人者謂蒲人毆之死乃為白其冤瀘人黃蒿  
豪猾官府不能制捕得之御史欲重諸法以數問訊  
無左驗罪止徙蒿得不死諸所平反多類是於是川

以南無冤民及爲湖廣督學使湖地綿邈試士歲必  
遍罔所遺逸士所擢拔無愧顏其所厭抑無紕辭人  
人爭自濯勵文教大興又敦本樹標因質成善湖之  
士莫不以名檢德行相爲引重故士之以文藝舉以  
才詎著者一一皆所滋植故今雖去楚幾千年士人  
感奮不啻一日謂善教之得人心者非耶歲庚戌虜  
犯京師 上遣近臣募兵河南議緒紛拏世寧適以  
叅政蒞任獨選丁男壯者從軍裁損供費後諸應募  
惡少多道亾且鹵掠獨大梁部署兵全無不法者尋  
督餉小灘小灘故監兌於主事第主事多聽商賈閉  
糴計使轉餉者無階輸官因翔其值得倚藉爲利因  
令轉餉者分糴附近邑奪商賈利而坐失主事陰所  
操縱民便之河南至今遵爲法成自河南擢四川按  
察使以憂歸在官十五年歸十年自讀書外絕無嗜  
好聯親戚同姓以恩義周其窘乏敬老撫孤嘗作糾  
宗碑族譜急鄉里之患不責其報司馬楊博中丞殷  
學御史崔棟交疏薦之竟不肯起未幾卒世寧行足  
世師鬱爲儒宗其所建造率鑿鑿副名實抱奇不售  
自斲其用迺後人咸克世家業雖不當世後必有達  
乃其所歎

魏學會

魏學會字惟貫別號確菴涇陽人十四爲諸生嘉靖  
癸丑登進士授戶部主事歷兵部尚書兼副都御史  
學會以南大司農謝政家居適虜寇西北羽書芻午  
奉詔督陝西三邊軍務屢辭不獲則移書政府罷款  
議戰執政報書如指始就道比至固原虜酋明莊二  
部各擁衆數萬擾邊三戰三北之斬明安走莊酋獲  
其部落五百餘級上嘉其勛晉太子少保廕一子  
世襲錦衣千戶賜金綺有如方計圖火酋而有寧夏  
之變哮拜父子故降夷宿有叛志會撫臣以事摧折  
之遂殺撫道據城以叛人心洶洶至則發二檄僞撫  
以緩之旋移檄各鎮徵兵餉而自統大軍駐靈州以  
偏師駐花馬鳴沙諸處扼賊要害使不得渡河窺陣  
又分兵收服四十七城堡以孤賊勢賊果大括城中  
金帛婦女賄虜時時與虜出入則多發敢死士夜銜  
牧擣虜巢牽其反顧兵餉四集則進師薄城下圍焉  
城堅不可拔計惟決水可灌灌城恐多傷士民且促  
之從賊不便乃築堤障水實土塞闌水圍城如帶漲  
七八尺城浸且圯城中懼且譟曰此可以行間矣乃  
射書城中疑賊黨使自相圖居民亦多受計爲內應

未幾哮氏果與其黨自相殺八月甲子夜城南門啓  
我師鼓噪入哮氏闔室自焚死寧夏以平先是言官  
急欲攻城有議以逗遛者詔逮曾問狀旣行去城破  
之日月餘耳何得言逗遛縉紳爲上書白寃章滿公  
車終不一言自明而 上感悟還官歸里亦不錄功  
廷議惜之學會魁忻偉杰平生慷慨多安攘大略明  
習邊事而士大夫所嚴事則其操履端方議論不阿  
閭閻侃侃郎計部時有權璫爲商人居間欲冒支芻  
糧銀鉅萬大司農業許之矣趨而前曰豈其以百姓  
脂膏國家府庫爲此輩潤囊橐耶執弗與大司農亦  
無以難之嘉靖中分宜相欲改郎吏部需一見始決  
謝不見亦不果改蒲坂楊公總督薊遼欲假事推轂  
不肯受事再強之則曰度支郎殿最有主者不敢當  
督府也未幾楊公入爲大司馬又欲得爲屬固遜亦  
不果改其生平不干進類如此督餉宣府時立交兌  
法吏不得緣爲奸適虜騎薄城中守者不知所出遽  
攝戎衣乘城指授方略虜遁去邊人大喜謂折衝禦  
侮乃不在秉鉞在主計耶頃之擢光祿寺少卿松江  
輸白糧不鑿當輸者罪其鄉人執政者以爲言不可  
再言再不可於執政門人也而守官不骫法如此尋

拜都察院右僉都御史巡撫遼東遼有叛卒黃勇者數勾虜爲邊患 朝廷懸重賞購之不能得至固不問或以爲言則曰勇本吾人向處置失宜故外逋耳我且撫而用之何購爲語傳虜中勇以爲信然禿市夷入城偵知虜在速酋帳下乃閉之甕城中而執之虜患以寧會當事者以修怨故抑其功止晉俸兩級尋以棒槌厓等大捷晉右副都御史巡撫如故尋以疾告庚午起爲兵部右侍郎改吏部轉左時新鄭高公以閣臣攝部事閣務繁重部事一切倚重焉爲立年格杜請謁新鄭勁直難下人獨禮重之每事未嘗

不稱善萬曆初元新鄭與江陵同在政府各以才雄一世顧皆倚重學會二相失歡而江陵欲得爲助心知與高公至篤也乃設事嘗之是時有疏論高公者矣正色語曰二公皆當時名賢同心爲國卽有失不難盡言江陵爲改容謝焉叅何高公策免廷臣失色獨大言曰 上踐阼甫數日首逐一顧命大臣豈正始事且此詔出何人手草不可不明示百官衆爲凜然朝罷更要九卿諸公詣江陵所諸公有至有不至而江陵稱病謝罷客高公遂行當是時江陵公以師保朝委裘與馮璫表裏用曾獨斷斷如也天下聞

而壯之未幾晉南都察院右都御史未行而有列白  
簡者有 詔褫新命以侍郎還里里居又數年爲歲  
癸未江陵公敗乃起爲戶部侍郎未任改右都御史  
督倉場有所不合尋陞南京戶部尚書其時言路大  
闢有羣擊執政冢宰者 上意頗動諸府部大臣合  
疏保留次及南都九列曾曰大臣進退取自上裁國  
是乎人情乎諸公心服其言顧重違宰執意相視首  
鼠奮然曰此自出魏某不可不以相累也諸公乃不  
復言保留事後月餘果有言之者其履方守正不詭  
隨如此遂再疏乞骸骨後又數年而起大司馬有臨

張忠

洮與寧夏之役嘗著四禮儀式爲鄉人祭酒每事爲  
綿蕞以行及居兩尊人喪先後六載不酒不肉不涉  
足中門事兄如父視族黨如其手足視鄉人饑溺由  
已輕重賑之無不滿意去而自處甚約蓋秦俗以商  
販爲業卽士類不諱持籌獨有菽葵斷織之風焉歿  
之日里人皆家臨巷哭尸祝於社其內行醇備又如  
此所學主誠信不欺文宗司馬子長書宗晉俱得其  
逸趣所著涇陽志遼陽奏議詩文若干卷

李世達

李世達字子成號漸菴晚更號廓菴關中涇陽人生



而穎異日誦千言自其髫年卽具博大之器卓犖之  
識一時薦紳先生咸器之年十二督學使者殷公置  
高等補博士弟子員尋爲方伯楊恪愨公所知諸所  
崇禮備至西安守石州胡公甫下車見而奇之與爲  
忘年之交當是時已瑩精大道孔孟根宗伊周事業  
日在寤寐中嘗夢謁 高皇帝授明珠一命曰善自  
珍之異日當爲國寶也年十九登嘉靖壬子賢書丙  
辰成進士授戶部主事癸亥調吏部考功司主事已  
調文選以養病歸隆慶改元起陞稽勲員外郎未幾  
調考功戊辰陞本司郎中調文選丁曾大父憂三年

起陞膳黃通政給假回起陞南太僕卿 神宗馭極

陞右僉都御史巡撫山東陞右副都御史總理河道  
戊寅以原官巡撫浙江旋告病復以原官起總督漕  
運兼巡撫鳳陽甲申陞南兵部右侍郎改戶部是歲  
陞吏部左侍郎丙戌陞南吏部尚書改南兵部尚書  
叅贊機務名爲刑部尚書改都察院左都御史掌院  
事壬辰以六年滿加太子少保癸巳乞骸骨歸奉  
旨馳驛養病巳亥卒年六十有七訃聞 上震悼久  
之賜諭祭謚敏肅始在戶部監兌湖湘旦暮竭心計  
佐度支之急前後入銓司佐黜陟品藻人羣百不失

一會大計當事者拱手聽裁即見斥者無不心服以去時徐文貞在柄地而秉銓者為嚴文靖時世達與陸莊簡同為司屬得以摻揚側陋薦進之往往從田間躋華臚列卿貳銓局之公流聞宇內前後所未有也其開府山東議班操蠲積逋減馬價著為繫令時蔣范儒以明經舉安廷璞李遐齡以知印擢楊果趙蛟以都吏進而白東阿朱萊陽一挂吏議又力昭雪之不以身格為軒輊也膠河議起身履其地相土宜權經費所為條析利害甚具東土不至勞民傷財為大役累其功居多戊寅改撫浙江不數月疏辭疾引

退八年起督漕河念寶應湖險惡歲漂舳艫無算為請開越河殺水勢列五款以上綱領節目犁然畢具其年而竣比原估料價省費一萬有奇晉南太宰與剛峰海公意氣相期擔荷國事所甄叙羣品如矚眉睫大察汰遣數百人下逮輿塗無不悅服者入為大司寇章數十上無非平允詳慎務廣上好生之德時上惡邊臣偽增首功怒至不可解乃劑量于輕重之間以定厥罪而比附重辟執不奉詔卒出其人于必死之地真回天力也會密遣廠校偵部事慮弊竇不可長屢疏明非體乞亟罷去上乃已權璫

馮憲藉威靈勢張甚在事諸臣莫敢誰何具疏先革其  
禁近供奉徐正罪以杜禍源是又發宮闈所未發之  
奸而開廷臣所不敢開之口已御史職雄俊所抨擊  
無與抗者往臺長不甚有所甄別世達謂吏治日衰  
民生寡遂皆職此之繇乃以考察例行之斥韓介劉  
瑜黃正色輩五六人臺中始悚然改觀易慮壹以奉  
公爲急且申明憲典傳布天下俾撫巡無得以問餽  
相加遺所薦下吏亦無得執贄及門違者論如法于  
時道路風清苞苴弊絕嗚呼盛矣生平正以褫躬忠  
以殉國不難以一人排羣議觸忌諱侃侃然貞而不  
激通而不隨宏而不疎細而不忮獨斷于是非襍選  
之中抗色于傾側危疑之際國事旣濟身名亦全誠  
可謂臣主相遭千載一時也所著有奏議八卷

南逢吉

南逢吉字元真渭南人生而穎慧不倫九歲通小戴  
氏大義後舉於鄉第三人時大復何公試其文歎曰  
奇才也計當魁已果然已會試不第師事陽明陽明  
曰關中自橫渠後有所振發興起而進於道德聖賢  
者將必自吾元善昆季始已舉進士授禮部儀制主  
事仰贊太廟明堂諸大禮以備一代獨偉之典而當

屬草多出其手在禮部七年出知保寧保寧公私冗  
奸不可詰振偷刷蠹祛故張新與之更始暇則課諸  
生萃諸校之雋而督教之一時得人爲盛舉人傳太  
者有隱操上官率不爲禮獨式其廬而問焉諸驛傳  
徭役里甲民兵悉有定畫義民史俊輩以捕盜誣論  
死者十一人寃十餘年莫雪者一訊雪之萬口歸明  
在保寧四年獨用嚴治巨室銜者造飛語中之陞雲  
南督學副使命獨以守入覲會有佐前銜者遂改知  
歸德府歸德以州陞又新造當三省之交其難倍保  
寧治歸德如治保寧陞副使備兵鴈門晉之阨塞巨

鎮也往兵備以督撫總兵在日惟飾具需遷慨然曰  
陣法不習匪我制虜虜實制我今之邊弊有甚於此  
者乎於是諭三關將士如令甲習之又按志盡復其  
演武場爲豪家據者當是時三關未分部也獨數巡  
行三關外軍聲大振一日山下有牧虜數十騎望見  
于旄來知有備輒遁去其爲虜憚如此又嘗條上備  
邊便宜五事詞多觸忌諱執政不之喜格弗上乃考  
察用前飛語罷時長子軒舉進士爲翰林吉士後奏  
銓部主事績上書詔許以原官致仕事父母孝師事  
瑞泉公竟其世無異財哀產則盡以父兄所貽讓孀



李郁  
四三  
譽其長曰此堂尊之瑞也棠正色曰冬花春秋書異何瑞之有其剛正類此性至孝母喪廬於墓側時友人馬尚賓刲股和羹養親愈疾涇陽處士師維學亦執喪廬墓遠近稱三孝焉後陞雲南知府政績著聞以老乞致仕詔進三品階通議大夫卒年八十一

張原

張原字士元三原人正德甲戌進士授吏科給事中上書言十二事忤旨謫貴州新添驛丞嘉靖初召復兵科尋擢右戶科原感知遇益以諫諍爲已任再逾年所上四十餘章言皆剴切至論國家大計及進賢退不肖詞嚴色正凜然風生上亦多嘉納之後以議大禮廷杖卒隆慶初贈光祿少卿

劉琦

劉琦字廷珍別號北郭洛川縣人也舉正德甲戌進士授行人司行人嘉靖乙酉擢兵科給事中時值聖上新政卽陳六事上嘉納焉嘗被旨差放冬衣布花因極言侵漁十一弊且日詣衛衙支放雖經寒暑遇風雨亦不廢僚長嘗推其勤勵不可及錦衣衛多權右乃愈振風采有玩慢者卽疏治其罪騰驤衛所統力士又率內豎廝養人也慣以私債冒領官銀

以取利廉得其情俱寘于法是年冬當述職期多有假稱緝紡嚇詐人財者琦上封事請旨下金吾捕治併上親賢遠佞疏他如峻宮牆之禁嚴宿衛之舖一劾而中官逮罪者四十人皆人所不敢言者一時京邑爲之肅然嘗存恤軍士嚴督五城及諸衛司勿得匿情其假克軍妻者皆察治之衛司謂給事真神明也未幾奉命清軍條舉三十事切中時弊咸下司馬勘行凡比試襲廕同事諸大臣中官多請囑以從寬貸竟劾治之雖事干勲戚權貴亦不顧也是時京師大饑請行者糞糜開倉之政饑民存活殆億萬計盜賊尋以屏息河南闌司都司相通爲奸以庶易嫡發其罪俱罷官若乃衛卒病發誤入宮門極力請救以從輕典妖人有犯繫晉獄當事者惕於權勢莫任其咎乃抗疏陳其顛末上命山西鞫訊得旨依擬發落然妖人者又爲權貴所庇遂發其隱過謫戍遼東瀋陽衛厥後上曰劉琦者是嘗進讜言者也因東宮大赦天下得還原籍抵家五年疾作而卒琦自童孺以及患難顯微之際咸以忠孝自砥雖遭誣謫人皆惜之

張治道





諸上官令不便者輒請更令或上官重更令輒抗議  
 執請不顧避邑故多豪強為民害者乃按捕諸大豪  
 論死者十餘人已又修長垣城修孔廟增學舍改佛  
 寺為子路祠至其條馬政事與止塞黃河決口未盡  
 施用後利害卒如所指陳人至今稱焉始去長垣人  
 為立去思碑後九年又就爛柯臺祠祀之以其才識  
 使得究所施即古將相之業奚足道哉顧獨以才高  
 語直為時大忌又自負不能下人年甫三十餘而歸  
 比卒時年七十歲矣家居者幾四十年所著太薇前  
 集後集嘉靖集少陵志長垣志凡數十卷始在祔時  
 一僧持綵筆授之及誕夕又夢僧以綵筆贈占曰文  
 明之兆也後果驗云

胡侍

胡侍字承之咸寧人正德丁丑進士授刑部主事歷  
 鴻臚少卿時追尊 獻帝議者力辯兩考之非侍上  
 言 祖訓兄終弟及蓋嚴嫡庶防覬覦爾魯嬰齊不  
 受命歸父漢病已不受命昭帝何以受命為哉唐睿  
 宗不當兄中宗宋太宗不當兄 菽祖以其為君也不  
 當稱兄則不當稱伯明矣 上怒其狂率出為潞州  
 判官

王懋

王懋字昭大咸寧人正德丁丑進士授行人以諫止南巡廷杖左遷國子學正嘉靖初詔復行人陞俸一級尋拜監察御史時廷臣議禮不合相繼去位有杖死者懋上疏論救謫高縣典史數遷至懷慶知府以疾乞休卒於家

裴紹宗

裴紹宗字伯修渭南人正德丁丑進士除海門知縣武宗南巡受檄署江都事貴幸憚之不敢干以私比駕旋省費數萬緡尋擢兵科給事中朝政以闕輒直言無諱後以議大禮廷杖卒隆慶初贈光祿少卿

許宗魯

許宗魯字東侯號少華陝之咸寧人也正德丁丑舉進士選翰林庶吉士巳卯授雲南道御史嘉靖壬午按宣大癸未陞僉事湖廣提學三年陞副使兵備霸州丁亥復改湖廣提學巳丑陞太僕少卿壬辰陞大理未幾陞僉都御史巡撫保定自保定歸十七年而當庚戌之冬復僉都御史駐昌平巳又陞副都御史巡撫遼東壬子乃致仕歸始爲御史也卽劾論侍郎巡撫兩人會宸濠事起又言上親王護衛宜隸之守

臣其刷卷蘇徽盡按諸大猾置之法所入銀穀至百數十餘萬世宗御極又首上封事中有勤視朝罷傳奉絕貢獻惜爵賞重邊備寬徵歛尤關切時弊者已又言常湯鄧劉之後議當復其封爵大同將卒素驕悍難制立罪其尤甚者一二人於是將卒帖然先是太監劉祥乾沒邊餉以萬計然罪止罷鎮復請下祥於獄祥大懼即如數抵償而御史曹嘉論諸大臣也有給事中希諸大臣意論謫御史宗魯力奏御史無罪至其劾武定侯郭勛太監蕭敬兩疏關利害尤大後以地震上疏又言羣小竊政柄宮壺議外事國

是以定而復易罪人方獲而遽釋蓋猶指助敬輩也一時以為危言宣大故有大邊正德初以地遠棄去不守然邊勢日感矣宗魯行邊顧歎曰大邊急宜復者乃遂條畫狀聞而當事者難之因補築近邊踰月工完上賜以銀幣疏謝且辭因請上無忽重地後宣大日益難守人始思其先見云湖廣以屬地曠遠往學臣數歲不一至宗魯歲試輒遍所至以行義倡士風楚自是益多名士既去霸州士日益思之乃為具白撫按於是復改督學楚中其繫時望若此是時又以救楚府二閹與御史力諍不屈二閹得不死

人尤服其鯁直而太僕時禁中貴人不得與事中貴人銜之往保定以近畿民苦甚乃嚴覈驛傳又定府州縣徭賦等式已又以築堤捍滹沱河有功上特賜璽書銀幣旌焉時南給事有與之際者論罷歸庚戌會虜警給事中張壺御史張洽合疏薦之召復都御史駐昌平昌平故無邊備議修邊牆三百里墩堡數百又疏革軍昌設一大將統入衛邊兵昌平改叅將守陵鞏鞏華分守駐懷柔爲東遊擊白羊口爲西遊擊又言昌平得一兵備治京北霸州者以至京卽昌平撫臣可罷不設議未盡施用無何乃移撫遼東至卽議處鹽課課大增諸軍占種民地者勅令悉歸之民遼東故與三衛諸夷互市羣議北虜亦開市遼東上疏駁論不可者十事遂寢遼人甚賴之力求致仕歸別構草堂積圖書其中日召故所與遊者置酒賦詩亦時時作金元人詞曲爲樂所著少華集續集與遼海歸田諸集數十卷其詩足繼唐音文復精典有漢魏風而作字又精詣古法諸行草大小楷書雜置法帖中人莫能辨至老猶能作小楷字當其得意時一揮輒數十紙不倦得其詩翰者咸珍玩藏之謂當代二絕云

杜鸞

杜鸞咸寧人正德辛巳進士授大理評事李福達之獄郭勛居間席書亦助之鸞上疏劾勛及書乞將二人先正國法徐命多官集議福達之罪不報及獄反鸞逮治削籍

周尚文

周尚文陝西西安人多謀善騎射讀諸書通大義清約愛士飲食同甘苦能得士死力善用間諜悉知虜中委曲故戰輒勝其總兵涼州時築凍墻募力士伏渡口殺套虜悉中肯綮自壬寅以後虜數入宣大山西無寧歲邊將望風奔潰惟尚文數當虜有功沙城慄來二捷績尤奇絕蓋近時名將也卒年七十有五後十餘年始贈太傅謚英驤賜祭葬如例

楊宏

楊宏西安左衛指揮使廉勇過人博覽羣史初守備固原虜入掠撫臣欲稍減奏報之數宏曰不可失事罪小欺君罪大坐是罷歸以薦陞都指揮仍守固原楊一清爲總督宏請築紅古城募衆屯田扼虜入寇之路掌陝西都司事平漢南盜斬首八百餘級陞總兵鎮松潘番酋久爲亂宏至集將吏斬以徇百姓大



悅平大盜鄆本恕廖林子等斬首數百級降者二萬人以功累陞南京都督武廟儲位尚虛宏疏宜早定以係天下之望不報召入後府時番亦不刺據西海入河套駐牧邊患孔棘宏曰兵少敵衆宜通貢哈密專意虜虜出套乃以河西改鎮守淮揚總督漕運剔蠹清逋增制淺船詔回南京中府淮父老傾城攀留泣擁路爲生祠累疏乞歸許之卒賜祭葬如例

補遺

郭文

郭文字博道陝西渭南縣人洪武十七年舉人除江西道御史建言謫戍遼東起四川什邡知縣致仕

劉昭

劉昭字克明陝西邠州人景泰二年進士授兵科給事中天順元年陞通政司右叅議左通政成化九年陞工部右侍郎十五年陞尚書二十年加太子少保改戶部尚書尋致仕卒計聞賜祭葬昭美姿儀善談論通政務敷奏甚稱英廟意嘗值端午節駕幸廣寒殿大臣俱從上問劉叅議安在左右以昭秩五品不得與對命特以一品服賜之其寵如此然其才幹亦有過人者故所至皆有能官之譽在部最久所

言動中事幾故徃徃見聽陰有節省之益其致仕落  
職益爲時要嗾言官所論以其子錦衣千戶綺之事  
及之云

鄒應龍

鄒應龍字雲卿陝西長安縣人嘉靖三十五年進士  
由行人選廣西道御史劾嚴分宜父子陞通政司右  
叅議累陞僉都巡撫雲南

孫丕揚

孫丕揚字叔孝陝西富平縣人嘉靖三十五年進士  
由行人選浙江道御史巡視兩關四十五年巡按順  
天四十四年巡按淮揚隆慶元年養病四年復除本  
道五年刷卷京畿本年陞大理寺丞劾大學士高拱  
嗾科臣程文誣論回籍六年仍復原官累陞吏部尚  
書加太子少保萬曆己酉再起原官管內外察典尋  
歸卒

溫純

溫純號抑齋陝西三原人嘉靖乙丑進士歷官兵部  
右侍郎兼都察院右僉都御史巡撫浙江時值兵民  
兩變又水旱爲災純悉心撫字嚴肅下吏不動聲色  
而凜然自不可犯尋轉戶部歷左都管內外察典人

言侵及遂拂衣以去公論惜之

趙應元

趙應元字文宗陝西涇陽縣人嘉靖四十四年進士由邠縣知縣選浙江道御史巡按遼東丁憂復除河南道巡按湖廣以劾張居正事爲民復補河南道陞南京大理寺丞卒

馬自強

馬自強字體乾號乾菴西安同州人嘉靖癸丑進士選庶常授檢討久之充經筵講官纂脩肅宗實錄陞國子祭酒時科條久弛漸失教學初意毅然以振飭自任首按士習爲姦利者取累朝訓典申明之絕請託抑躁競日以正學廸諸生成均中咸爽然易觀聽焉神宗在東宮爲講讀官凡所進講不爲微文與義務取目前易省事欸欸曉譬冀有所感動上聞而甚悅上登極擢禮部右侍郎充日講官丁內艱歸上嘗與元輔張少師言自強所講解易省又問問服將闕否服除陞禮部尚書仍充經筵講官宗藩繁衍諸請名封婚祿歲以千計中多詭冒垂越而先後條例亦自相牴牾以故王府科宿猾習其穴竇交結諸藩狡役出入爲奸莫可究詰一一清其源本




協于情法盡汰諸積胥之無良者凡王府章疏至親  
爲裁決隨榜之部門明示行止由是諸篆隸無所索  
公宇肅然丁丑知貢舉 世廟實錄成加太子少保  
戊寅進太子太保文淵閣大學士入辦閣務甫月餘  
而一疾竟不起矣計聞贈少保謚文莊遣行人護柩  
歸

雒于仁

雒于仁號少涇三原縣人萬曆癸未進士授直隸肥  
鄉知縣丁亥調繁清豐縣戊子陞大理評事己丑建  
言酒色財氣四箴最爲激切 上怒特甚賴時相寬  
假得免廷杖竟落職爲民

李伸

李伸字道甫三原人進士爲監察御史按江西能預  
防宸濠奸擢守嘉興以道自重言笑不苟對吏民不  
怒而威有大豪侵官錢事覺在繫奸利益甚伸廉得  
之令併收其子子聞膽破嘔綠汁死有殺兄謀奪其  
官者不具輸狀伸一訊服於是奸惡束手無敢撓者  
每從學士弟子講學相詰難至忘等威及遇事不假  
毫髮舉措因民不干聲譽中和之政獨推伸焉伸去  
郡久士民誦思如一日



之章夕省人守者

三三五

山

Vertical columns of faint, mostly illegible text on the right page, possibly bleed-through from the reverse side. The text is arranged in approximately 10 columns.

